

咸

涉

堂

集

庭

正



序

跡公方外友也尊人騎田翁舉明孝廉晚年歸隱以文章名世公受業於趨庭究其所學蓋有本云九歲學爲古文詞十三學制科業爲魯諸生十五遭時百六棄儒冠學爲農圃以奉朝夕十九學聖賢之道出爲塾師藉修脯以代耕年三十有五孝廉見背忽盡棄其學而學佛始終所學惟知有本而已古文詞偶一爲之童時夙習耳予初見其爲文對客談笑若不經意千言立就矣越十年則少



需之期以明日無難色亦無愆期又十年曰姑置之延至旬日微有難色矣猶不愆期也年來却婦謝客或強之則大有難色報以閱月常愆期矣及觀其所爲文無以異於前者心竊疑之偶與座客語及此客曰嘗見國手對局移時方著一子累日而後成譜其思慮深也我輩爲之一日數覆局矣彼深於道者故難爲言乎或曰夫夫老矣駿馬之駒一日而行千里及其衰也駑鳥先之彼日暮塗窮者宜其文之拙也予曰二客休矣文章千古事得失寸心知客之知公不如公之自知也就而問焉則笑而不答良久乃去學道數十年今始識羞噫方今拈椎豎拂棒喝星馳機鋒迅疾者曾識羞否此識羞文字也踵前集以出艱深耶老拙耶觀者不妨具眼珠江鄭際泰撰



余昔家居聞南海番禺山川秀麗篤生異人山巔  
水涯時有隱君子伏處其間嘗以未至其地未見  
其人爲憾丙戌歲來令三水訪求遺逸得屈翁山  
陳元孝遺書讀之不勝悼惜迨後識跡刪上人於  
大通古寺一見如平生公穎悟絕倫於書無不讀  
早年謝諸生籍耕硯養親中歲爲僧專修禪律間  
爲古文詞有大家風致余來往郡城嘗造其廬劇  
談竟日畱詩以贈公過余署贈答亦如之公所著  
咸陟堂詩文集二十餘卷盛行于世近有同志續



序  
刻其二集屬余序之昔浩初祕演皆以文字而逃  
於空當時柳子厚歐陽永叔且與之遊序其文  
傳世余才弗逮二公無足傳者然公之詩文清超  
絕俗遠過前人當不待余文而後傳也第以方外  
之交真摯異常不爲之序千載後孰知予兩人文  
章深契出于恒情之外邪公老矣余倦於宦遊思  
歸田里大通鼎湖之地停橈過訪賦詩贈答佳會  
不可常而交情不可忘也爰作弁語

閩中方外友弟鄭玟

咸陟堂二集

東樵山人跡刪鷺著

月華頌

樊太史崑來督學政於嶺南戊子夏五月  
望後二日按郡東旋舟次博羅江上時夜  
二鼓聞空中人語促起看月華者推篷視  
之果見月重五暈五色眩目賦詩五章是  
日適有會䟽請廣科額之議意文明之兆  
云陳子東崖繪爲是圖予爲之頌



一六之精三五之盈離中之魄坎中之明望舒之  
御廣寒之庭元兔之窟赤道之行聖德之瑞人文  
之稱在天成象在地成形應物成鑒無私永貞應  
運成化不愆其恒重華御宇海晏河清大人利見  
闡幽洞冥蟬蛸掘閱發蟄飛鳴玉蟾倒景繼照持  
平歲在戊子律中蕤賓天中既望二日壬辰文旌  
東返回舫宵征候潮待月漏轉初更萬籟寂歷孤  
燈在檠帝敕天使欽哉承凝月重五暈天朗氣清  
攬衣延佇注目屏營紅殷紫邏翠華碧城綠沉青  
瑣金園朱纓天光炫耀雲物嶒嶸賡歌喜起遐邇  
同聲維帝有眷斯文聿興封章待命四門闢扇物  
華天寶垂象璣衡東樵作頌東崖丹青昭告寰宇  
魯國諸生及時崇德仰答休徵

贈梁擎霄入學

我昔入學時問年剛十二總角戴儒巾藍袍長埽  
地君今入學時問年方十四髡髮襯紅纓儒服遵  
時製簪勝腰拖紅童心增壯志七十老山翁拭目  
看新貴親見今時人憶著兒時事莫笑老無成心



空先及第莫倚年富強轉盼老將至早病下帷燈  
早奮食牛氣秋風槐正黃早折天上桂御史舊家  
風羨君能述繼祖父昔儒冠羨君能豎幟昨來騎  
竹馬今攬青絲轡攬轡欲何之青雲隨所至借問  
眼中人誰老還誰穉除却梁擎霄天下盡兒戲

住持鼎湖述懷呈諸方同學

先師密約會書紳只許住山不爲人默存牢記三  
十臘裹足不思求轉身祖庭且過頻來客自甘長  
作伽藍民芻廬去後音響寂寶華王座生塵埃天

龍八部增惆悵衆中不辨主與賓我住鷲潭睡方  
足快哉四體由屈伸三竿紅日出東海門前剝啄  
何頻頻披衣倒屣出見客客來申請殊殷勤乃云  
山中二千指衆指行籌輿論均無繩自縛縛將去  
捨却蜜果甘酸辛脚打行纏腰匾擔二時鐘板隨  
僧偷毘尼細行謹繩檢恢諧不復依天真從前文  
字皆綺語本來面目新日新無口匏瓜無法語有  
緣針芥有來因朝住山晚爲人師訓半違還半遵  
倒行逆施已如此日暮塗窮勿復云莫讚嘆莫嘲



履隱堂詩集卷二  
三  
曠大家扶起破沙盆代與如來轉法輪

荅蘇敬山中秘見寄一韻四首

鷺潭非久住鷗鷺自相親不覺青山老偏驚白髮  
新避人思舊隱借地寄閒身淨埽三生石相期話  
昔因

我愛眉山老談禪得最親三玄與三要一見一回  
新古佛本無相妙高隨現身不知留帶處曾否憶  
前因

神交空色相至道泯踈疎親書札頻頻寄詩篇字字  
新雲高天不遠雪靜鶴藏身明日谿橋上相逢笑  
有因

法城憑外護魔佛別冤親借重回天手重看慧日  
新徧行菩薩道說法宰官身知有籃輿約花前問  
勝因

初春秣陵華子封雲間吳瞻御李筠孫閩漳  
家少奇入山見訪適樊院公繼至夜話同

賦用樊韻

威鳳巢阿鶴在林不妨高下有知音東南賓主初



廬山詩集卷之二  
廬山  
傾蓋聞蜀山川近盍簪四壁松燈留下榻半窓蘿  
月照行吟客星聚處文星合從此籃輿興可尋

已丑初春十二夜樊學院崑來舟過鼎湖見  
訪以公事促程不容下榻乘月出山留題  
而別別後賦此

住山不覺此山深鳴鳥時聞惠好音袖裏八行懸  
密約江干雙節快幽尋風兼花氣迎歸院月並蓮  
燈送出林從此祇園有甘樹春光何處不清陰  
脫畧形骸忘主賓逍遙鵬鷁自相親三年兩試巡

方使萬壑千巖訪道人恰好山高先得月懸知雪  
後早生春題詩留在三生石不待籠紗字字新  
天上卿雲任往還夕陽斜月去留間春宵不費千  
金買竹院容偷半日閒小歇亭皋供緩步促程驛  
吏候重關清風攝入奚囊裏化作松濤出萬山  
百丈嶺頭啼鷓鴣攀藤乘月下天湖雪山鷺嶺應  
如此劍閣蠶叢得似無一徑松杉排鹵簿數聲猿  
鶴代傳呼何由借得僧繇筆寫作溪橋送客圖

荅僧



明知定業信難逃，歸去家山不憚勞。  
早起帶雲耕麥浪，倦來欹枕聽松濤。  
光陰過半添僧臘，勝事無多讓爾曹。  
何幸新詩遙見寄，吟來春雪曲偏高。

荅李天章明經韻

老來生計類丹霞，絕頂孤峰禮法華。  
一縷寒煙煨榾柮，三竿晴日曝袈裟。  
懷人欲買剡溪棹，乘興都忘峽路賒。  
借得高齋容信宿，春風到處卽吾家。

輓樊大機

美人贈我湘筠榻，何以報之枯木禪。  
羌笛吹殘煙雨外，楚些招向水雲邊。  
蓮池舊社推前輩，荆樹新陰屬後賢。  
却恐重來不相見，篝燈深夜檢遺篇。

輓鄭質書

去年哀輓西泠子，隔歲重傷鄭質書。  
半載交遊今若此，八旬光景復何如。  
萼樓歎逝虛芸閣，帶艸傷春冷玉厨。  
留得衣冠與麝鳳，腰間看取佩金魚。

請梵法師入山講律

行得一尺說一丈，吾道于今誰向上。  
眼中所見類如斯，分門立戶相非謗。  
宗師視律爲小乘，豁達頑



空成莽宕嚴淨毘尼不習禪跼踏拘攣依榜樣二  
家門戶分不分造車合轍憑宗匠梵海法師予所  
知行解相應方等慈華嚴句下見佛性談經講律  
開羣迷大心未了慈恩願西遊帆海尋真師身雖  
未到心先到歸來掩室汾江滑龍天斫額更招手  
斯人不出斯何時我在天湖最高處禪月慈雲相  
鑑顧虛將講席待師來九夏安居好同住小乘側  
耳聞所聞大衆傾心句非句四分毘尼糞埽衣窳  
子安心免疑懼此回方與細商量當人直指還家  
路梵法師莫猶豫榔標橫擔不見人直入千峯萬  
峯去

荅高少尹裕公見寄韻

寄跡鷺潭不繫舟豈知塵世有離愁遲君舊社三  
生石懷古清風八詠樓巴曲豈堪賡郢雪野芹何  
以荅珍饈殷勤報語朝天客池上花開許共遊

春日盛齊庵任一峯太史入山見訪時以寒

食還里未及倒屣賦此奉寄

歸僧一抱古無絃寒食東風指暮田有客賞音流



水外何人陪話白雲邊荒山留得重來約好事應  
知不浪傳靜貯清言待玄度草堂一榻爲誰懸  
昨夜文星下紫微朝來泉石挹清輝移將天上花  
磚影照破林間白板扉野老下山虛倒屣村童留  
客笑牽衣何時得伴任公釣共把漁竿話息機

題丹霞三笑圖寄沈融谷郡佐

舊作

丹霞之山錦江水萬仞高峯特亭峙澹翁結社傲  
東林選佛選官相繼起五馬大夫八詠公鄉水情  
深道味濃連鑣結駟入林去須臾悵別何匆匆主  
人送客客久立溪水東流日西入紫駟蹀躞驕欲  
行舟師惆悵催歸急虎溪之水綠玉潭籃輿驄馬  
情耽耽臨岐一笑無彼此前三三與後三三旁觀  
珍重僧繇筆頰下三毛差髣髴世人貌假不貌真  
哲匠傳神更傳骨白社曾聞三笑圖龍眠學士推  
前驅後來卷軸滿天下虛無想像徒區區何似丹  
霞入方幅主賓相對溫如玉見聞隨喜發菩提大  
衆仰觀皆取足昔時遠公今澹公前有修靜後龜  
蒙三生石上長相見雙鏡池邊或再逢更有當年



彭澤宰休文接踵清風在一朝披卷見儀型千里  
同堂聞警欵賦就長歌報使君遙從舊社挹清芬  
鯨音閣上九苞鳳二酉山中五色雲五雲散作天  
花雨羣生引領如環堵我本羅浮山澤臞覲面不  
妨先寄語沈大夫沈大夫何當戴笠逢下車靈山  
一會儼然在記得丹霞舊話無

荅李祈年

舊作

二十年聞君名三十年識君面祇今四十見君心  
方悔從前識君淺君昔好遊中好道粵南燕北知

名早間吟麗句寫情性偶著枯棋散懷抱時人空  
識管中斑滿眼相知殊艸艸一朝策蹇歸平來九  
州五嶽荒蒼苔閉門獨坐見朋好耳根靜處聞風  
雷年來所學成何事木榻已穿跟著地典墳丘索  
徒汗牛無極老翁不識字南方有儒七尺半中間  
所貴惟方寸五骸九竅等儔人三千三百猶羈絆  
心知妙道太無端相逢不覺發深歎感君高辨如  
洪鍾長篇短句爭異同腐儒半生媿株守新詩願  
真懷袖中他時岐路或相遇迷津記問考亭翁



送梁旭丹先輩解帳歸里

舊作

一年休假罷琴書，又是西風九月初。  
絳帳夜燈鳴蟋蟀，錦江春雨長鱸魚。  
青山次第扶筇入，白髮歸來對雪梳。  
學道無成慙父友，五雲深處悵離居。

少年行

舊作

千金散作五陵遊，一笑能輕萬戶侯。  
日暮鬪鷄過廣陌，天明騎馬出長楸。  
知音未遇留青眼，壯志無成諱白頭。  
獨醉邯鄲沽酒肆，幾回開匣看吳鉤。

六燈詩

燈檠

夜遊誰秉燭，太乙杖青藜。  
獨立虛堂迥，高懸萬象低。  
因人成背觸，隨影自東西。  
珍重焚膏者，相依定不迷。

燈草

皮膚都剝盡，覲體見虛明。  
膏火自煎爍，素心無變更。  
浮沉非著意，生滅本忘情。  
寂莫池塘夢，深宵對短檠。

燈花

或步堂詩集



四壁掛明月孤燈懸夜珠閒心偶相對好事不如  
無真勾風邊影光陰隙裏駒方思離火宅何暇問  
榮枯

燈炷

殘膏搖冷燄深夜結青烟就地收餘燼還山草太  
玄盈虛觀物化明滅悟薪傳剔取塵根淨真光返  
自然

燈遮

眼前三尺暗物外古人心觸目皆如此真光何處  
尋雲霞互舒卷日月有晴陰吾意在韜晦因之懷

陸沈

無不燈杖

心力愁仍竭昏沉願早休此君頻動駕古佛猛回  
頭動處光生席移來月滿樓相期振輕策繼晷許  
同遊

和陳天草見過不遇

梅花太輕薄笑我未能閒竹杖自爲計柴門曾不  
關題詩佳客去乞食老僧還三復壁間詠斜陽明



遠山

題尹月平苦吟圖

蒼松參天千仞直下有騷人坐磐石風濤過耳萬  
籟寂詩興如泉瀉絕壁傾湫倒岳留不得侍兒洗  
硯三拂拭剡藤鋪案壓玉尺濡毫注水出古墨凝  
神定慮窮幽蹟興觀羣怨隨所適輕搖白羽涼生  
席不辨凌陰還火宅兩眼可青亦可白鬚眉半頰  
仍半黑此是當今老詩伯若問月平人盡識

山中書懷

役盡聰明博得痴蹉跎筋力陡然衰晚圍革帶朝  
移孔左策藤枝右傍籬鳩食鶉衣甘我拙鯨吞虹  
飲任人爲扁舟擬逐華亭後歸向鷺潭理釣絲  
火宅何堪再補茅濁河不用更投膠吟詩我欲通  
羣怨讀易誰能玩象爻深夜風簷鳴蛤蚧虛堂月  
牖挂蠨蛸靜觀物理須休歇莫漫逢人便解嘲  
靜坐不知西日斜竹風和影互交加唾餘乍見蒸  
成菌齒落都忘飯有沙蟲語喚醒憨布袋鐘聲催  
起破袈裟悄然悟得無生旨緊閉松寮禮法華



偕諸子集小歇亭啖荔

千尺懸崖七尺藤自來自去自躋登  
禪心對景枯  
難得歸計逢人說不能水鏡豈堪呈  
白髮荔香寧  
免致蒼蠅憑高四望增惆悵大地茫茫一個僧

荅陳耕烟

南方有奇士自謂能耕烟閉戶理常業  
終朝耕石田詩成風雨後寄向水雲邊  
明月已盈手鶴聲猶在天

送樊晦菴學院還朝

木天天使騎天馬六幕秋光萬里程  
心在玉壺羣象正舟移香浦八風清  
鴛鴦得路難留住鷗鳥忘機亦送行  
一曲滄浪聽未徹驪歌聲引棹歌聲

凍谷年來半隱淪憑誰吹律轉洪鈞  
晨鷄失曉日長夜陽鳥飛光天發新卵翼  
不遺任子窘吹噓先念浦江貧輜軒去後絃歌遍  
風雅平分化外春

炎方今見古文翁載奉天書到粵中  
合浦探來珠盡剖孫陽過後馬全空  
澄江解纜連船月直道揚鞭兩袖風  
爲語東南桃李道明年華實報蠶叢



磨符奉詔出長安鳳閣承恩到錦官玉壘雲霞生  
琬琰石門薌澤長芝蘭孝謙經學追三絕紹述詩  
篇曲百盤想到月波多勝事薛濤箋爲贈琅玕  
按郡曾迴學士車采風頻到野人家名言贈我懷  
中字好句還僧壁上紗北道將歸無惹茨西風相  
送有袈裟懸知別後思君處夜夜南天見月華  
因依古寺息衰齡車笠相逢眼一青拂拭蓬蒿成  
棧樸貽來金石有參苓公餘每枉林間約學富旁  
參教外經岐路希心非一一願分眉睫託蠅螟

紫城北望興騰騰白社佳遊記得曾乘月一過雲  
頂寺維舟三問海門僧每因齋戒虛良會未有詩  
篇逐勝朋花下聞香便歸去涪翁名已入傳燈  
記得春宵送客詩秋風回首悵臨岐自慙燕石逢  
周客漫擬黃金鑄子期投老空山多難事歸耕負  
郭少閒時何由借得鵬風便物外翻身任所之

定安莫孝廉忠州落第歸自太原持其中表  
王晉子明府書物見訪出詩索序惠以孔  
林箬艸一束野人受之無所可用其歸里



也作箸艸歌以贈其行

野人昨夜得奇夢舉頭天上來威鳳鳳喙銜將錦  
鯉魚魚腹飛光魚尾動醒來初日照牀頭門前有  
客名忠州入門袖裏出書札欵欵開緘知舊遊羶  
綸寄贈寒范叔感激多情王子猷八行紙盡語不  
盡置書肅客迴青眸問客里居家五指問客聲華  
今國士問客公車萬里程問客西征渡滹水歸鞭  
踏破嶺頭雲新詩價重長安紙從容惠我孔林箸  
艸木有靈通妙里箸兮箸兮胡爾靈一本叢生盈

百莖神龜居守卿雲護天荒地老儲精英芻蕘側  
目不敢視太卜得之如百朋最初勾萌甲方坵混  
跡蓬茅挺孤直淒風苦雨自年年河洛圖書虛物  
色蒙君拂拭爲剪裁置身廊廟辭蒿萊美人贈我  
瓊與瑰何以報之煙中煤守株野老如嬰孩萬事  
不理心全灰吉凶悔吝何有哉靈箸神策胡爲來  
諸公筮仕須良媒挾之走馬黃金臺假爾泰筮無  
疑猜肯教韜格生塵埃假爾泰筮無疑猜肯教韜  
格生塵埃



送李禮山明府應詔入京兼柬鄴下張子白  
拙哉鄴下張中宿傲骨剛腸文字腹彈琴隱几送  
蜚鴻出見督郵帶嬾束善哉雒下李連山大材小  
試心自閒鐸書傳誦苗民口姓名題在御屏間中  
宿盤根還錯節利器難藏鋒易缺一曲長歌歸去  
來兩袖清風伴明月連山政簡刑獄清桑麻滿地  
花滿城一紙天書出金馬抱琴携鶴謁承明前張  
後李皆人傑閉門造車當合轍自從身入選官場  
淵潛天飛各殊別大魚深深潛在淵大鵬高高飛  
上天殷勤報語大鵬道天風得便須周旋

荅虞政行見寄

翹首仙風渺藹間朱霞飛去鶴飛還冰壺靜貯手  
江月蠟屐時登萬仞山手挹清河須徧潤身隨膏  
雨未教閒勞君贈我琅璫寶歸去天湖靜掩關  
兩度維舟端水濱今來猶得見陽春豸臺紫電通  
幽墮鈴閣菁精飯隱淪宗炳曾爲池上客虞翻今  
作幕中賓爐邊蕓熟留將半待與高人續勝因  
高掛蒲帆返舊林西風吹冷野人襟孤蹤獨往遭



投石衆口爭鳴懼鑠金危綠逢秋愁改色甘棠到處有清陰題詩寄語青油幕莫負靈山一片心

長歌行贈守軍林飛寧

曲江瓊林春宴遊仙人挾策登瀛洲鷹揚豹變推前矛風雲應運成壯猷偏裨建節來端州大才小試非等儔叔子緩帶飄輕裘機雲儒雅稱風流大人遇合會有時君不見燕領投筆今封侯歌以言志燕領投筆今封侯一關崧臺星峯削絕壁秋水長天天一碧中有巨鱗潛大澤白晝無雲旬霹靂

一朝化作垂雲翼萬里培風六月息龍門豁開見顏色大魚小魚隨轉側大人遇合會有時君不見天池深深蠡莫測歌以言志天池深深蠡莫測二

關

桐城桐樹垂清陰良工斷作南薰琴七絃七軫

含元音阜財解慍諧衆心風詩譜作球與琳一唱三嘆天倪深遠人側耳中沈吟聞風百里遙追尋聲應氣求如芥針清風襲襲生衣襟大人遇合會有時君不見鳳皇鳴向岐山岑歌以言志鳳皇鳴向岐山岑三關



荅關茂才子璿

之子信殊衆飄飄瓊樹枝相逢端水上不覺還山  
遲獨崔下高樹怒蛙喧一池囂塵滿天地何處可  
揚睂

峽江如淨練明月近中秋舍此不肯住無人堪與  
遊遣愁憑筆硯借夢宿漁舟夢起各揮手白雲天  
際頭

祝王太守鐸音

南來五馬玉花驄棠樹留陰草偃風十日竝輝豐  
蔀外二天長覆鼎湖東麓山間氣歸翁孺嶺海輿  
情借寇公野老謳歌無可獻繞籬霜色晚香叢

題贈岡州顧明府迂客

客從岡州來遺我方幅素皎潔儼冰霜清光豁煙  
霧覩物懷美人美人在天路我欲往從之秋江森  
難渡藉重管城君寫我情與愫相期貞白心永言  
金石固

荅馮廣文爾公見寄五首次來韻

吾道寥寥幸不孤南山聞響北山呼舊遊夢斷雲



離岫好友書來月印湖官罷文章傳彩筆僧閒煙  
雨護衣珠籃輿密約分明甚借問柴桑記得無  
拚將丘壑送餘年祖席難饒嬾情禪老樹秋聲催  
落葉虛堂艸色暗荒煙故山在望歸徧切往事關  
心憶未全強欲出頭頭已白幾回搔首問青天  
戰退魔軍膽亦寒筆床墨架半拋殘弓形待盡留  
雙髻真宰無權役五官病借呻吟藏我拙老嫌面  
日倩人看勞君從史修僧史日暮窮途著述難  
鷄足何須問衲衣未成真是况真非汲乾東海神

魚失夢老中林俊鶻稀積雪日高獅子瘦窺池月  
滿兔兒肥摩挲冷眼傍觀得三摘秋瓜抱蔓歸  
半天雲頂起狂波獨泛虛舟奈若何短燭搖風心  
志忑孤燈連影舞婆娑痴參妙總宗難妙濫受和  
南衆未和報語端州馮外史老僧到處有行窩

鄭珠江太史生日謝客舟過大通盤桓十日  
拉遊海雲月依諸刹時同遊者嚴子靜功  
麥子仲貽也卽事分賦  
仙人騎鶴下揚州桂水星槎任去留十日棲遲煙



雨寺連宵信宿海雲秋僧陪好客歸鄉井花近重  
陽憶故丘弧矢四方胥有志何妨李郭更同舟  
水邊林下駐油幢翠竹黃花匝紙窓車笠多情難  
艸艸蒲團留話自椿椿高柯拂日松千尺清影臨  
流鶴一雙笑倚西風問漁父鳳池曾否似桐江

題扇贈鄭珠江太史

誰將便面寫雲林秋水蒹葭淺也深老樹兼霜偏  
有色虛舟移棹本無心靜窺碧落思鴻漸回首金  
門笑陸沈莫道行雲閒出嶠曾天無地不爲霖

輓梁童子童子字石藏昔時父母艱嗣禱於

圓通菴得之生有慧業能詩與文與人不可

苟合年十六而殤屬纊時索磬於圓通磬

至笑曰此吾家故物也一擊而絕

可惜石藏藏不得早將美玉就磨礪未成上國珪

璋器已失天然造化工兩耳聞塵消慧業一聲清

磬證圓通猛然認得吾家物花落水流天地空

贈嚴崙溪壽

老人妙處在坦率金石爲心鐵爲骨仙風道貌俠



肝腸鶴髮童顏冰雪質前年過我野人居令子隨  
行孫繞膝賓主都忘禮數踈石榻蒲團坐來密午  
鐘午食草草陳舉箸揮匙腹克實起來捫腹說奇  
書上下古今供品騭皮裏春秋紙上人抵掌片時  
公論出剖精剖髓見聖賢愚孝愚忠雪冤屈主人  
側耳聞未聞上客清談畢未畢須臾大笑發高歌  
矢口成文叶聲律從容緩步出荆扉餘音嫋嫋風  
蕭瑟別來林下兩經秋隔江佳氣何葱鬱相聞弧  
矢正高懸見說芝蘭香滿室吟詩寄語老仙翁往

事分明還恍惚我年七十三翁年九十一兩人先  
後十八年閱盡滄桑與人物但願年年月月日復  
日盡如今年今月如今日懷古高歌興未闌主賓  
相見無相失

山行留別友人

知有名山興無爲岐路愁客程春雨外歸計麥涼  
秋我友在汾水仙人家十洲相思渺無際何日許  
同遊

學院樊晦菴夜過大通話至鷄鳴而別賦此



肩陔堂詩集卷一  
昔有王子猷冒雪盪雙槩不入剡溪門已作平原  
想今有樊院公深宵駐官舫白駒食場苗天鷄報  
清響遐哉古今人是一還是兩入門情轉深迴舟  
興偏爽安得王子猷同時各來往渺然發高歌干  
秋恣心賞

李善藏家蓄小犬如拳詩以索之

小盧恰好倩銜書待與青猿問起居展也相依同  
地聽枵然無用笑黔驢物情未免分賓主佛性何  
曾別彼予莫戀新豐舊鄉里隔江深巷是吾廬

賀丁學田廉使攝篆臬憲

崧臺繡豸日炯炯旁燭無疆靖梟獍懸知空谷舞  
刑天吹噓直到孤峯頂孤峯羣虎正耽耽磨牙礪  
爪爭胥讒出逢繡豸各鼠竄震雷虩虩山巖巖刑  
天舞罷載稽首繡豸仁明古希有仁爲雨露明日  
星旋轉乾坤如反手去歲祥風天上來旁駮五馬  
到朝臺貪臬題破清徹底一十七縣無纖埃今年  
建臬推廉使呼吸風雲空犴狴曾天白日照蓬蒿  
野老謳謠遍瓠蘆歌曰安得杲日長在東光生萬



豁還千叢狂猿野鶴適情性長嘯一聲虞網空

數鼻答巖允來

客歲湖山去勞君贈我詩忙閒吟不厭早晚和來

遲明月當懷照清風拂袖吹相思如昨日煙雨悵

臨岐

今歲湖山返聞君築艸堂移簷迎柳色買地就荷

香有夢時相見懷人水一方浮丘仙窟近佳氣鬱

蒼蒼

壽丁學田廉使二十韻

聖世挺名賢昌期五百年岳靈方應運圭影正中

天弧矢知春早風雲得意先登瀛仙藉貴巢閣鳳

儀翩時雨下霄漢晴光起瘴煙崧臺瞻峻極端水

浥清漣愛日丹葵正延齡翠柏堅潘輿隨燕喜萊

蕞舞躡躑菽水將冰檠饗殮計俸錢飲甘虞邑井

題破石門泉河潤覃隙溼謳誦入管絃燃犀堪處

處繡豸自平平心寄冰壺迴門教肺石懸批虛仍

導窾遊刃却忘荃刑措陽和候春歸黍谷邊八荒

同軫域萬彙待陶甄世外邀青眼池頭種白蓮靈



山尋囑累金地嗣因緣大道無私用真機本自然  
好分仙掌露涓滴及枯禪

送僧還會陀

夢想頻叅紫竹林老年行腳負初心何來南海能  
飛錫還向東溟索臥針水月定依前寺佳雲山應  
許後期尋臨岐一句聊拈出探水何須問淺深

思歸

銷磨白髮半酸辛潦倒紅塵媿隱淪老似鷄窠空  
偃蹇病來獅子只嘖呻夢中不辨誰爲主醒後那

堪舉似人一盞殘燈伴孤榻酸風吹冷破頭巾  
松影依窓東復西何堪鐘鼓促晨鷄問天不語頻  
搔首面壁無言暗噬臍勁草偃風柔繞指高花和  
雪踏成泥閒將歸計問童子笑我詩囊不住携  
拚取深山換淺山水邊林下屋三間蒲團有脚行  
藏便鐘板無聲夢寐閒靜對亭陰迴暮景飽餐粗  
糲駐衰顏緘書先報鄰翁道淨掃茅堂待我還

荅朱甸菴見寄來韻

冷鐘冷磬鼓三通徹骨寒威刮面風同是浮生苦



吟客文章無計送年窮  
窮年前路苦無多一度休心一放歌  
閉戶自驚人  
漸老春風遲爾破烟蘿  
英雄退步即神仙出處羞為造物憐  
昨夜空林飄一葉隨風飛上淨居天  
林下不見三國書  
送馬立方設帳西粵

儒門貴成物猶患好為師世諦且如此聲聞自可知  
知我將辭法席君乃事臯比揮手難為贈霜風吹  
素絲

臘除投寺宿春早別鄉關水陸東西路鶯花遠近  
山舞雩童冠在硯北圭竇閒即此堪尋樂何須問  
孔顏

贈西禪鐵公

古鏡塵封不計年一朝高掛在西禪法王榜樣存  
些子本地風光却宛然手種蓮花開舊社親煨菜  
蕪憶前賢于今正好明頭打莫笑當時曾化顛

有贈

東施病捧腹西施乃效曠賣去千擔假方出一擔



真解下髻中珠黑夜投路人冷市委滯貨誰知無  
價珍蠅頭白馬尾蝸角鐵如意七尺交南藤半幅  
剡溪紙癩狗想生天野干助歡喜南阮晒舊禪隨  
俗聊爾爾陽春枯木萌啓蟄雷發聲天花開確噉  
毒鼓驅奔霆盲龜縮首住野鴨側耳聽借問此何  
時彌勒方下生

贈嚴將軍

正氣浩然周法界以直養之得無害本命元辰絕  
成壞回光返照觀自在將軍本是偉男兒氣定神  
閒心力大進步英雄退步仙縱橫闔闢皆三昧騎  
官馬走官街奪賊鎗趕賊隊凱歌唱入九重城翻  
身跳出三禪外不動干戈致太平雲臺麟閣遙相  
待嚴將軍真慶快回頭識得本來人靈山會後龍

華會

贈法輪和尚開化於石公祠  
六環高振出端溪遠近春光物色齊陸賈城邊開  
別院羊公碑下建招提一江月攝千江月南岸鷄  
如北岸鷄珍重法輪頻勸轉桃花開處便成蹊



初春江南潘桐廬入山見訪不遇而返聞其  
致語索贈賦此報謝  
山中昨日寄書來有客乘春到草萊西憲府中騎  
馬出東臯林下看花開相期車笠知難料遙索詩  
篇未易裁取次嬾殘歸舊社芋房畱半爲君煨

春日送樊崑來太史還朝

秋風欲別復停輪回首離亭柳色新過我兩衝江  
寺雪畱君三見嶺梅春山光雨霽隨帆轉漁浦歌  
殘返棹頻從此茅堂虛一榻高懸還待再來人

輕裝就道燠如蒸破衲還山冷似冰老我將同需  
代客貴人休笑索緣僧板輿計日先春發蠟屐逢  
山向晚登想到金臺多勝事新詩爲寄五花綾  
歸飛雁陣逐鷄行鷄首相隨入帝鄉水驛泊船題  
定遍花磚到日影初長三城穠李春無賴十郡磨  
崖石有香除却清風與明月別無一物在詩囊

挽丹霞方丈

曾從壇坫識潘郎回首頭顱各有霜我作前鋒君  
後競大家贏得一生忙



爲佛爲儒只此身無端真外更求真自從一見華  
亭後伊洛門中少一人  
二十年前老古錐登壇作白媿師資眼前人物那  
堪憶惟記丹霞掩耳時  
拚身捨命不辭勞魔力偏憎道力高同病相憐吾  
與子抱疴人各返林臯  
山窮水盡客心孤林下相逢兩病夫老我欲行行  
不得輸君神足疾馳驅  
病起愁聞剝啄聲渡江僧報法幢傾老人諱說傷  
心事一笑相看暗愴情  
鶴樹潛輝慧日斜題詩欸欸寄丹霞剡竿倒却誰  
扶起大地難逢老作家  
三尺龜毛爲白拂一枝兔角作烏藤丹霞不少閒  
家具何事無人紹祖燈  
祖燈明滅暗情窠法乳源流溷濁河爲法求人難  
草草甄甄隨去待重磨  
磨甄作鏡照何人喚鏡爲甄用未親照用兩邊齊  
放下一回開匣一回新



送熊劍文適安南行藥

先生國手天下無所居成聚今成都出門四顧天  
地小東西南北將焉如朝來過我話遠別自言浮  
海須乘桴長風破浪載輕橐橐中止有軒岐書世  
人讀書不識字循行數墨徒區區先生所學良有  
以得心應手通靈樞尻輪神馬周八極不思近取  
思遠圖千里萬里歸咫尺一鄉一邑胡守株存神  
過化事無事應時及節趨亦趨耳邊聞有大越國  
國君敬佛還敬儒三教九流一以貫髻中奪得空  
王珠求賢如渴方吐握延師矻俗還針愚更煩真  
方施真藥老安少懷均所需先生行矣亟只且朝  
發夕至懸一壺壺中神物用有餘刀圭入口翻榮  
枯國人病已藥卽除長揖國君歸故居  
趙侍郎濬公冒雨見過予時分衛渡江未及  
人盡倒屣滯霖竟日薄暮解維適予返棹遇於  
江干連舟一晤立談頃刻稍晴乃別別後  
悵然燈下得詩六首

水部聲華重天潢物望高亮工熙帝載象服賜宮



廬山詩集卷一  
袍暫假辭雙闕求聲出九臯輞川權未畢先許到  
蓬蒿

野老懷中刺名園物外春盍簪存雅道出郭訪閒  
人雲脚藏僧室潮頭隱釣綸隔江招手處恐是武  
陵津  
雙井起朝煙千山夜雨懸客乘青雀舫僧放白鷺  
船遠近憑雙眼陰晴有二天雲深江水黑歸興且  
流連

客擬解維去僧方乞食歸斜風吹岸幘密雨溼山  
衣得得留官舫忽忽話釣磯斯遊良不偶回首見  
晴暉

昔年蘇學士借笠野人家過雨中憑玷迎風帽任  
斜村童喧巷陌山犬吠籬笆底事今猶昨重來興  
未涯

雨歇促揚舲明燈下淺汀虛堂懸一榻隔水見雙  
星鶴夢依南畝鵬風指北溟明朝悵延佇天外數  
峯青

春雨渡江錢心齋陪趙侍郎濬公王固山裕



公見過不遇薄暮歸舟晤於江岸立談而  
別悵然賦此

守株林下息交遊客到茅堂禮欠修賓主相携羨  
王謝詩篇今復見錢劉江豚吹浪留青雀水鶴乘  
潮近白鷗此地從來足煙雨笑將圖繪問僧繇

春暮姚二曾漢英昆玉偕蔣子蘊過寺爲邑  
令公姚齊州設齋貌老僧小影夜將半令  
公乃至話至鷄鳴而別別後卽事賦詩十

絕

長官曾與嬾僧期六日能來話片時今夜珠江好  
明月定留圓影入方池

十日柴門九不開閒庭饑鳥啄蒼苔午齋未漱臨  
流齒何處香厨送供來

魚遊破釜甑生塵多謝官庖致百珍擬把伊蒲當  
蔬食却慙圭影已初申

攢眉偏笑古柴桑松下清齋興倍長地主不來齋  
早罷含情凝睇水雲鄉

吳中佳士蔣元卿頰下三毛筆底生索與死蛇添



一足錯將蚯蚓點雙睛

添足點睛非故我灰頭土面得良朋燈邊人物燈邊影意外茅堂意外僧

剪燭西窓榻解懸虛堂如晝夜如年長官不用傳呼入絃管掀翻嬾惰禪

一曲鈞天下碧空東風吹到梵王宮江城百里絃歌地攝入空林寂莫中

寂莫四窓人語稀小筵清供客忘歸匡廬新茗丹霞筍差勝西山老蕨薇

雞聲催放木蘭橈送客何須過板橋咫尺開門對春水群鷗來往自相招

讀武林郭宗臣嘉祥錄有賦甲寅之變海氛

陸梁淞東州郡被俘婦女萬餘郭公倡義

募錢五萬貫贖還五千餘口旌表不受既

沒淞人至今尸祝之

武林有琪樹奕葉流芳徽靈雨固根柢甘露凝柯枝蔭覆天與喬咸承雨露滋四時任代謝一氣挺葳蕤上有咫尺天下有方寸田良田豐玉穀天



步丁迤邐海風颺波濤斥埃生烽煙哀鴻號中澤  
豺虎橫荒阡覆巢靡完卵破屋遺灰燼玉貌委泥  
沙紅顏逼鋒刃琵琶馬上魂蹀躞同壑粉蒿日徒  
苦心解驂難獨任出效申胥哭還輕季子金金錢  
贖縲綆義聲騰古今全活五千餘翕然歌德音同  
牢圓破鏡分室栖萍梗權奇返義妻韜光謝鐘鼎  
叢桂老金沙萬古清風迴清風迴且長薤露晞朝  
陽一磨泣郊藪羣鳳鳴高岡東南沛膏澤北闕著  
循良我本林下人邂逅承清光遠寄嘉祥編懷人  
天一方金石永不磨志之慎勿忘

春煙

青皇一氣混洪濛靜會方知色是空孤岫影籠雲  
母帳百花香罩紙屏風入山採藥忘歸路隔浦聞  
歌失釣翁咫尺春光何處寫米家水墨有無中

花魂

上苑遙聞羯鼓催春教薌澤出靈胎寸心冷魄銷  
難盡紅雨香風去復回蝴蝶夢中無路入木樨花  
下有人來楚些不用重相賂淨却塵根萬念灰



屏陽堂詩集卷一  
飛泉挂壁峯

空山過雨萬重泉如霧如雲下碧天洗鉢僧歸花  
雨外濯纓人在玉壺邊峯高正好尋源入壁立何  
妨激水懸報語舊遊諸勝侶同來枕石聽潺湲

半房新芋待君煨寄潘桐廬護法

半房新芋待君煨撥盡爐頭欲冷灰榆柳已更寒  
食火蓬門添長過牆苔尋僧有興須乘興嘉賓能  
來及早來莫笑嬾殘曾授記登瀛人在古崧臺

六一飛水潭洗鉢

樾椎催起七條衣果腹便便上翠微應器支持臨  
澗洗空囊結束載雲歸猿收餘食邀禪悅鳥散生  
臺解息機何事頻來勤拂拭不存些子掩光輝

六一飛水潭洗耳

兩片新荷穿二漏一條白練出千山枕流贏得塵  
根淨鑿影真同木石頑淵默雷聲寧見聒是非風  
過不相關當時巢許如知此空谷希聲萬籟閒

寄祝李廣文遠霞

行脚歸來脚未洗放下腰包蒙縕被門前競渡喧



若雷林下遊人鬧如市茵枕繩床暑氣清緊閉柴  
門聾兩耳何來佳客歎重關南海李生善藏子入  
門行色殊怱怱東郡趨庭戒行李而翁於我神交  
人脫畧形骸契精髓自誇學究會談禪見說心空  
曾及第手持木鐸出潮州士習文風憑振起白社  
籃輿久不歸長庚甲子週還始九節花開澗底蒲  
三株露作甘泉醴採蒲酌醴好承懽望遠懷人書  
片紙李生李生行莫遲篋裏辨衣先料理到時若  
問山中人別後枯禪無足似依希記得少陵詩眼  
中之人吾老矣

寄羅戒軒

難難難得是忘情痴夢連宵向石城別我江干人  
兩載思君林下月三更宗雷不比他賓主沮溺還  
須老弟兄幾度書來慙未報報詩吟到鶴歸聲

題朱北渚廣文小影并送之官

其人卓卓其神躍躍其行鱗鱗其言諤諤一坐春  
風如朱光庭之淳慈神仙風致如朱希真之磊落  
好學多聞如朱萬卷之淹博窮理盡性如朱考亭



眉陽堂詩集卷一  
之道學合四賢而一之得斯人之大畧是之謂衆  
角一麟羣雞獨鶴何須委吏乘田不待抱關擊柝  
調羹用爾作鹽梅天將以子爲木鐸

賀呂淑明茂才

文章無價玉無瑕半月池頭羨作家彈取貢冠趨  
馬帳投將班筆夢江花百川流水通洙泗千里追  
風起渥注野老隔江頻刮目孱陵今已出南衙

贈麥仲貽茂才

白首窮經欠一第如人宿負未焚契才高意廣名  
未成猶驥伏櫪時悲鳴一朝書債還已畢追風逐  
電龍駒出從旁觀者爭贈言錦上添花飭著蜜或  
云大器須晚成或謂春華待秋實似以鼓刀鈞玉  
人方之虎觀談經日宋廷太素不足多顏駟馮唐  
差可匹同聲合喙渾雷同笑殺鷺潭船子公功名  
富貴不足道風雲霖雨皆虛空伊周不入仲尼夢  
舜蹠同醒半夜鐘麥居士麥居士俗論區區當掩  
耳藍袍加體未爲榮青雲承足何須喜人言不似  
老僧言人爵何如天爵貴明年八月槐花黃忙殺



腐儒稱舉子雷旬浪涌知爲誰不是曝腮是燒尾  
曲江宴罷歸乎來重過鶯潭尋舊誼此回方與細  
商量當下忽忽難啓齒我縱不言君自知明月在  
天光在水

題贈邑明府何萃菴耘藿園八景詩

在家之家桑與梓出家之家雲與水三槐九棘天  
家兒十洲三島仙家子烟波一釣家在船躬耕百  
畝家田里真隱真空贖隱名小隱山林大城市從  
前隱顯同一家耘藿主人胡不爾主人寄跡安樂

窩濠梁一室荒煙蘿潘縣桃花春雨後召南棠樹  
清陰多陶令宅邊栽五柳翟公門外張雀羅物識  
主人知姓氏東閣官梅本屬何洞中偕隱鮑家子  
海上相逢春夢婆夢中猛醒黃梁熟朝煙突出茅  
茨屋滿園葵藿勸加餐舊治遺民餽芻粟飽食開  
窓看白雲遐心遠寄西天竺清磬一聲人閉門古  
佛三身勤禮足有時策杖沿溪塍有時野寺尋老  
僧有時教子事章句有時課僕荷鋤耕策蹇經過  
馴雉處黃童白叟咸知名昨買扁舟問烟雨話到



斜陽隱高樹耳邊聞有耘藿園身雖未到心先去  
雲屏翠壁石假山梅竹葡萄最深處晚霞月照薜  
荔牆索與詩人留好句我無好句有好懷何須妄  
想家蓬萊我公便是神仙魁不離煙火長靈胎噫  
噓唏安得把茅蓋頭作鄰舍池邊共看蓮花開

荅程維翰見過之作

隔水懷人上小樓荔枝紅遍稻初收風塵久別身  
將老煙雨重來興轉幽雲日交光搖水面山城移  
影近船頭聞君更有尋僧約相送溪橋笑未休

荅鄭明府虛舟見過二首

槐棘正亭午桑榆已夕陰誰從車笠外相見水雲  
深驟雨且留客清風長在林晚晴掛帆去孤月印  
波心

贈我懷中字吟來齒頰香湖山先有約風雨待連  
牀日竝雲心遠秋先火宅涼何當簡迎送巖壑借  
清光

和高邑佐珠江夜月歌

君不見暮潮過雨流滔滔大風小風吹江濤火雲



淨盡天一碧夜珠涌出星河高君不見尉陀古甸  
仙人城城北城南盡月明兩岸蘆花看不見隔江  
漁父老無情誰家竝舫傳湘管吟散江波波影滿  
停橈罷釣側耳聽遠寺疎鐘隔將斷我欲從之乘  
虛舟扣舷鼓枻相唱酬鷺潭月色不宥放獵心結  
束隨東流珍重詞壇罷麈戰長篇寄我雲邊翰沈  
吟唱和興無端好事平分人各半莫招手莫招手  
夜夜相逢開笑口只愁化作明鏡臺照見衰翁衰  
相醜

得高邑佐裕公書似以官閒爲歎予日爲忙  
累求閒不得報之以詩索與相易戲之爾  
究竟不可易也

人來聞說長官閒門逕張羅蘚陣斑無事擁書消  
白日有時凭几對青山雀能穿屋公停訟蠶自排  
衙吏散班如此真閒閒不易從君乞與嶺南蠻  
聰明日減事偏增冷局何曾得似冰文字欠酬知  
已債逢迎虛負避人僧光陰強半風欺燭形影無  
多夜繼燈擬向城中尋龍斷閒忙相易不相應



報將一紙長官書  
角齒平分付太虛  
易地皆然聊爾爾  
現成受用總如如  
刻舟豈便求將劍  
取掌何須換得魚  
至道無難嫌揀擇  
由他戴笠與乘車

舟泊三水訪鄭虛舟明府留齋授粲賦答

雨過江城接暝煙  
停橈正愛月光圓  
緘書先與鳴琴約  
抱枕尋思下榻緣  
老去心孤佳夢短  
岸旁聞說長官賢  
捲篷強起明燈坐  
猶是鷺潭淺水邊  
沙鷗竟夕不成眠  
飛上丹丘訪稚川  
暫輟簿書延野客  
快談風雅作詩仙  
瓜蔬半入齋僧饌  
薪俸全歸乞米船  
不免扁舟重過此  
縣門應笑老饕禪

寄友人

近移圃地就烟霞  
抱甕歸來日已斜  
借雨添生封戶蘚  
塞雲隔斷過牆花  
高朋別後無知己  
斯道年來少作家  
閒倚秋風發長嘯  
伊人消息在蒹葭

寄樊崑來太史

無心道者倍多情  
遙計官人萬里程  
謂取荆門先覲蜀  
却從漢口直趨京  
舟中好夢停車笠  
馬首高雲拂旆旌  
上巳分携秋又半  
江南江北月同明



焚香三復嶺頭書咫尺雲泥悵索居好句每從行  
後得神交難遣別來踈胸中典籍樊夫子物外佯  
狂楚接輿八座重來知有日意中人已老樵漁  
送客東風糝柳花懷人秋色絢晴霞蹉跎日月馳  
雙轂來往山川總一家車轉金針天路直槎通星  
漢水雲賒何當得接南飛雁重寄新詩到海涯  
木天消息近如何聞說還朝勝事多三殿爐煙通  
画省八磚花影赴鑿坡天高雨露鍾槐棘地迴雲  
霞護薜蘿童子不知人萬里日沿江介候鳴珂

百年難得片時閒不問當塗與住山盛世致君書  
萬卷衰形勞我屋三間國乘纂就須重譯僧史修  
成更待刪近得美芹思獻納一緘遙寄五雲間  
美芹滋味澹偏宜細嚼徐吞祇自知消食不妨蔬  
笋貴解醒還羨葛花奇赤城霞起堪留客白社花  
開欲待誰近買扁舟釣明月無由得到鳳皇池

輓陳母李太君

見曉堂中老主賓一回相見一回新襄州道者今  
何去留得龐婆作主人



龐婆却是女居士百草頭上祖師意柱下家傳三字宗慈儉謙光皆妙義

臺山路直少人行婆子行來却現成供佛飯僧還課讀念經聲裏念書聲  
丸熊畫荻不尋常教得兒孫事顯揚雛鳳覽輝將奮翮俄看懸鼓在西方

西方東土本來同只在當人寸地中回首便歸安養國不空空也是真空

策杖登龍訪令兒空庭闐寂鳥聲悲酸風吹折高槐樹正是萱花萎露時

趨庭愛日戲斑衣佇待明年祝秀眉六十九年休恨少人生七十古來稀

當年會銘德山碑十載重來奠素幃白艸岡頭倘同穴不妨遲我寫泉扉

諸方知識口誦誦高座靈前說小叅老衲自來無法說任他凡聖笑痴憨

一瓣心香十絕詩殷勤持贈不須悲後人得到忘情處悲喜相尋未了期



送吳于湘

重到炎方豈偶然奚囊佳句杖頭錢山川雲物歸  
雙睫翰墨圖書共一船似續舊遊觀雅樂披尋手  
澤間貪泉雞聲啼破江湖長莫放劉琨早著鞭

壽梁節母

霜明桂殿月輪高獨鶴聲聞出九臯角枕冰心盟  
皦日蘭堦彩服映藍袍扶桑倒景窺鸞鏡玉樹南  
枝長鳳毛正是瑤池懽宴後九天濃露醉仙桃

壽吳母

我昔栖禪朝徹堂主人愛書如墨莊左圖右史交  
輝煌對客討論相低昂內庭嘻嗃聲不揚咄嗟立  
辦筍與筐嘉餼旨酒羅芬芳座客盡醉縑細旁衆  
醉獨醒予括囊蒲團夜短蠟燭長主人知我仇杜  
康建溪春茗親烹湘須臾粥飯晨供張醉客未起  
僧先嘗爐中火宿五夜香三竿紅日明東廂酒醒  
客散天一方主人還坐讀書床佳兒學語日尚黃  
庭前索笑牽衣裳受書一日過十行隨聲答響成  
文章閨中令德齊孟光相君秉鐸師遐荒時雨所



化無界疆天桃穠李生宮牆九重側席咨賢良蒼  
生引領遙相望溘然薤露晞朝陽御風乘雲遊帝  
鄉月娥孀獨明素粧桂殿夜深人履霜鳳雛奮翮  
將翱翔後先鳴和諧宮商一鳴五福熾而昌再鳴  
萬壽樂且康三鳴天姥出雲房洞庭鼓瑟來英皇  
麻姑鳥爪擎霞觴雙成歌舞吹笙簧蟠桃果熟還  
西王瑤池仙宴樂未央洵哉積善有餘慶子孫保  
之慎勿忘洵哉積善有餘慶子孫保之慎勿忘

送趙侍郎濟公

君不見天潢沛澤爲江河大川小川皆盈科君不  
見三台八座翊宸極大星小星胥拱北君不見六  
鰲鼎足奠皇輿大國小國同車書從龍利見會如  
此猿鶴聞風助懽喜春來冒雨過山家雪後乘潮  
趨帝里帝里迢遙在日邊日高解纜放樓船南粵  
山川仍舊路洞庭春色入明年明年花發知何處  
楚水吳山隨去住竹院松門煙雨深佇待重來問  
祇樹

答李禮山主事見寄



天湖移棹返東林獨釣寒江識淺深斜日寫將松  
鶴影冷風吹破水龍吟爐邊煨芋遲嘉客雪後開  
門拜好音凍谷不知陽律轉寒溫空費范袍心  
世味無如道味親高標清韻出風塵補將衮職趨  
雙闕留得文章在片鱗煙雨尋僧思舊約丹霞布  
地是家人貴遊若問林間事牛放西溪牧漸馴

冬日還山舟發大通江行二日方抵鼎湖適

與丁觀察鵠首相值舟子促程未獲一見

卽事口占寄呈虞政行記室

獨釣鷺潭水一灣晚來無夢到家山天風不放閒  
雲住吹入千巖萬壑閒

眼中巖壑意中人粉壁留題墨瀋新不約聯舟溯  
端水隔船誰識有閒身

官笛漁歌遠近情舟人夜語未分明潮雞喚起三  
禪定髣髴傳呼垤澤聲

曙光雲影薄牕紗咫尺遐心老眼花慙媿鄰舟轉  
相訝官船前後有袈裟

水淺沙乾閣小舸風吹破衲冷蕭騷前船隔浦明



同隱堂詩集卷一  
燈過延佇清光想豸袍

江城日上早潮平  
戍鼓鼕鼕未放行  
遙指峽山雲外影  
晴光開闔見雙旌

羅隱橋頭晚棹歸  
沙鷗低宿又高飛  
畫船已泊崧臺岸  
竹杖還山日影微

岐路同歸笑步趨  
山窮水盡見吾徒  
寫詩問訊青油幕  
知有神交覲面無

天都吳永圖見過有贈次答

勞生由定業出世未能閒  
餘習成膠柱流光類轉環  
僧寒遲出定客至勉開顏  
林下一攜手悠然思

故山

故山在何處雪後梅花新  
君官同遊否予當作主人  
百年歸有道一笑本非真  
灑埽三生石從容話

昔因

高涼太守吳丹山過寺見贈次答

紙牕明似晝縑被燠如蒸  
有約來纓冕當機理葛藤  
風雲天上客青白眼中僧  
明發還山去孤峰可共登



陪吳丹山太守還鼎湖登覽盡懽卽事賦贈  
君不見廣州城外貪泉水塗人一畝成吝鄙昔有  
隱之吳刺史題破汙流變清泚君不見高涼東去  
有湯泉炙手可熱如烹煎今有丹山太守賢澡冰  
浣雪心冷然二泉遠近千餘里兩賢先後千餘紀  
清濁炎涼指顧間過化存神無彼此高涼太守予  
所知黃山白嶽鍾瑰奇治平第一宗公漢風雅千  
秋祖少微結髮爲郎侍清燕天膏流出文華殿玉  
書寶硯奉恩綸金榜銀題灑宸翰堯天舜日曾照  
臨夙夜心同宵旰心青齊比歲丁荒饑中澤哀鴻  
嗟陸沉 帝曰疇咨若予采汝往欽哉熙帝載化  
離載道返桑麻懽呼動地盈山海山海高深難等  
量功成反命先對揚 至尊含笑需岳牧蒼生引  
領思循良高涼舊是干戈地我公出守修文治東  
南桃李盡官牆遐邇絃歌徧陬溘公餘遠興入詩  
情結束琴書赴粵城一路山川尋已遍維舟江介  
問孤僧孤僧家在雲深處遙指天湖共來去千峰  
環翠好盤桓半山小歇頻延佇一聲啼鳥一聲鐘



千樹桃花千樹風竹林二阮愛狂簡園蔬野簌聊  
從容前山斜日催歸急泥聽飛泉人久立沿谿茗  
椀代流觴踵事蘭亭混車笠車笠不知誰主賓三  
瞻四顧何逡巡許我隔谿建亭榭松閒應有再來  
人

山中小除戲筆

禪鐘開靜日西傾大竈然燈小竈明午過斯饑啼  
寸白宵分無寐惱三彭蒙茸緼被還詩倩寂歷寒  
蟬唱道情隔壁楚吟穿耳穴方知林下有雞聲

山中除夕戲筆

野狐伎倆不知休百丈山前戀首丘傍祖受田栽  
敗種從天乞假牧頑牛拋殘雞肋頻頻顧拾得蜣  
丸密密收欲賣癡騃無售主判將滯貨付東流

壽丁觀察

登瀛名在列仙班熊軾清風鎮百蠻棠樹近連萱  
草色豸袍朝映舞衣斑星辰初轉陽和候雨露平  
分水石間三郡一州同壽域可容猿雀老空山

辛卯元日遣懷



兩髦夾凶棄儒巾底事蹉跎過六辛

前辛卯奉嚴命謝諸生籍

薑桂自嫌香辣減繁華不與寂寥親  
枯藤倚樹隨高下積雪欺梅漫屈伸  
撫景依稀仍故我豈知天上斗杓寅

寄懷李禮山主事

我所思兮李連山古人置身今人間  
操刀試割與不淺鳴琴隱几心獨閒  
閒來撰作三字句鐸書傳誦八排蠻  
賣刀買犢事耕耨革心革面回臬頑  
公餘退食還學圃抱甕澆蔬待時雨  
青菘紫莧各生成

成苦瓠甜瓜無去取水兢清節畏人知  
淵默雷聲動當宇屏風灑翰大書名  
綸綍王言下九京循良拜命不俟駕  
琴律相隨別縣城峒蠻卧轍喧雜道  
士女壺漿遙送迎慈母顧之如顧復  
欲行不行胥至情驅車就道豈得已  
側耳時聞呼籲聲順流放棹過高峽  
峽水峽雲迎旆旌我在湖山望佳氣  
清風吹向端州城移舟相就快相見  
岐江水落江月明月明照見孤僧影  
不見其餘見霜頂頂上霜毫比素心  
眼前火宅鄰水井從茲舊社客來稀  
臨別



連舟燭當秉話盡方知斗柄橫坐深不覺衣裳冷  
還舟香篆字全銷呼撼癡童昏不醒明朝解纜各  
西東我自入山君度額額南秋色楓葉丹額北霜  
風拂馬鞍取次行吟趨帝里須臾積雪滿長安  
去日見紆鷓鴣綬移時聞換鷓鴣冠閭闔日高宮  
錦畫祇園秋晚衲衣寒貴遊若問湖山主退院歸  
來理釣竿

題故將軍樊曦墅牡丹

前有鐵山伍太史後有山人趙裕子先後齊名寫  
牡丹不尚鉛華工墨水伍公氣古骨格高信筆疾  
書不求似趙公取態妙傳神濃淡淺深皆至理誰  
當兼此二公長有明將軍號曦墅將軍講武仍好  
文輕裘緩帶窮經史有時說劍靖海氛有時舍毫  
書絹紙寫作天香一兩枝一陽一陰見端倪鐵山  
得氣趙得神三人角立如鼎峙令子大機子故人  
兩世通家講年議昔所未見今見之裝潢卷軸得  
如此文孫蓀蓀莪孝且慈手澤無忘隨杖几持來示  
我索題詩展卷懷人拜復起牡丹牡丹如有神不



異姚黃兼魏紫年年花發上林春  
畱與兒孫助歡喜

送吳童子受業三水

小子吳士楷早有奇童稱七歲就外傳不學能所能十三習書法一一由性靈升堂未入室所恨無師承十五依淨社懇懇通精誠易名爲佛楷字曰皆木生於義各有取期士續佛燈良楷皆木類虔斷憑準繩委心從哲匠大厦須棟楹楷也拜受命朝夕隨巾瓶須臾失怙恃隻影嗟熒熒寄食烟雨中日誦維摩經誦經識大意罔極難爲情愔然別我去俛仰從弟兄卑枝託孤雛飲啄時悲鳴悲鳴志有在終軍方請纓圍圍涸轍魚躍躍天池鵬安得扶搖風挾之圖南溟三水有師帥德教今康成南橘自無媒雕飾殊冰競努力事羔雁焉知年齒輕孔融七歲兒登龍謁李膺願言師古人陪鯉趨孔庭趨庭有異聞報我山中僧

壽關母

醞醞魚鮮盛嘉宴製錦徵言施繪綯奉觴上壽交



酬獻醉倒金尊歌舞亂世間樂事疇不羨達人視  
之如露電關生有母洵聖善長齋繡佛老不倦青  
蔬白粲香廚膳菽水承歡葷酒斷修成白業淨如  
練樓居迴隔紅塵絆教子代耕事觚翰羣孫繞膝  
卿雲爛憇憑從師棄髦弁舐犢癡情非所戀賢哉  
母也今罕見凌婆龐媪相後先日月光華旦復旦  
春風不老宜男面

與樂塊然一別五載辛卯春再來頴南入山  
見訪惠以臨川佳穎快談累日而別詩以

送行

管城老矣甘委棄結束閒身請休致奚囊高挂心  
血枯蒲團坐破風騷氣不似臨川光照人風捲殘  
雲花滿地自從一別四五年日夕神交通夢寐三  
生石上去還來主未歸山客先至袖中有物何陸  
離鄴水珠華川澤媚管城見獵起偷心十指懸椎  
事遊戲戲拈秃穎拂流塵心手生疎失精銳起來  
問訊臨川公今昨憑君別同異臨川大笑爲予言  
性命文章無兩是卽文字離文字流水行雲豈濡



滯新硯持贈非等閒從此轉多難了事

布袋和尚歌

長汀子太無賴十字街頭見三昧逢人信手笑一  
聲乞我文錢入布袋打開布袋一些無放下原來  
百雜碎引得兒童逐隊來牽衣拍掌稱奇怪第一  
怪鼻直眼橫肚皮大第二怪多喜少瞋能忍耐第  
三怪垂手入塵無慙惹第四怪酒肉場中持淨戒  
第五怪左手得來右手賣第六怪恩愛冤家兩無  
礙第七怪不僧不俗不魔魅第八怪粉碎虛空成  
一塊第九怪打翻筋斗雲霄外第十怪本來面目  
無成壞要知面目本何如且待且待彌勒下生有  
人在

送虞政行歸覲應舉

有母豈能長不出仲由負米毛生檄有母豈能長  
不歸茅容雞黍老萊衣君不見當今國士虞家子  
別母從師報知已程門雪色馬帷經管城從事將  
甘旨朝饗夕餐誰倚門春樹暮雲人陟屺一朝彈  
鋏賦歸來身在粵城心在里粵城三月柳條青江



上閒鷗宿淺汀歸人折柳驚鷗夢烟雨濛濛送客  
情問客歸情遲與速吳越山川在心目問客歸裝  
重與輕琴書滿載江風清問客歸期早與晚槐黃  
時節青衫換問客歸程短與長上林花發飄天香  
天香飛出明光殿五色卿雲成豹變晝錦還家璧  
月輝春光不老宜男面此是桑榆愛日時潘輿八  
座興居健人生遇合會有期雲泥咫尺遙相羨念  
來應笑頷南蠻井底窺天天不見

示蘇釋蘭

客從何處來舟發碧溪泚乃祖岸菴翁山僧老知  
已昔我爲儒時館席鄰桑梓雞犬聲相聞往還室  
孔邇母族舅之甥父族姑之子忘分更忘年相見  
無彼此翁老得奇聾哀然契禪理大聲喚不聞無  
聲招則起時來相問訊措畫案上水我以手待口  
翁以目待耳竟日寂無言神交良有以有時弄柔  
翰鍾王剖精髓有時發詠歌遐心和陶李從茲數  
晨夕盤桓忘歲紀孝子名汝孝棄書從利市養志  
克承懽菽水供禪喜蘭孫名釋蘭總角隨杖履朝



廬山堂詩集卷一  
誦彌陀經晚搨黃庭紙翁曾爲我言大道貴知止  
須富貴何時人生行樂爾歡聚能幾何忽忽風塵  
起揮手各行藏白雲俄萬里我得無生忍翁證涅  
槃旨蹉跎四十春日月如流水少壯忽成翁兒童  
羨瑰璋客來識姓名悵然念前軌

野望

杖策尋幽去川原入望賒過橋人與影爭席鳥兼  
花蝶竦收殘雨鯢桓咽淺沙一聲何處笛始覺有  
人家

贈建隆微叟和尚

建隆老人心不死走遍諸方拾故紙精麤眞贗總  
包荒賤價得來高價市手提鐵筆不容情刪訂去  
留皆有以三玄三要一字關有句無句五家旨同  
歸大冶辣鉗鎚煉就頑金斷犀兕神奇臭腐總神  
奇握矢成金金復矢千人萬人換眼睛一箇半箇  
得皮髓草屨踏破額頭雲擔竿探水荒水寺衝風  
冒雨入天湖不管拖泥還帶水小歇亭邊抖客塵  
嘉客堂前曬行李無端撞著家裏人不序寒溫序



年齒八旬行脚老趙州七十五年邨紗喜看看大笑忘主賓草草相逢無彼此我有一則爛葛藤煩師竄入禪燈裏上大人孔乙巳化三千七十士尔小生八九子皆作仁可知禮如斯而已乎如斯而已矣

寄祝高涼守吳丹山

山氣高涼海氣清美人出守播賢聲琅玕啄鳳二千石閭闔搏鵬九萬程馴雉化鷹憑道力嘉禾瑞麥入詩情文心已到丹成候何用仙坡訪茂名

讀天都吳永圖粵遊詩寄贈

別來三復粵遊吟識得斯人道力深作賦久專風雅席著書長抱治安心朱絃應律青油幕白雪同聲翠竹林何日高涼炙高論菊花遲我一披襟

題朗然先生行樂小影

朗然先生洵朗然光風霽日紅塵邊年方志立遵養晦持理勝欲人勝天天上麒麟見頭角五株桂樹生庭前蒼松翠栢垂廣蔭成梁除道由心田景行周道平如砥長虹飲澗跨百川餘波挹注起溝



廬西江移粟供糜餽翳桑菜色盡生色日費百金  
糜萬錢桂林象郡慕高義致書束帛來粲粲東西  
列肆建亭館土木會計憑仔肩三揖四讓返書幣  
自稱指代休餘年兒孫滿地花滿眼美酒滿尊賓  
滿筵人生行樂貴知止何能垂手還入塵天形道  
貌希髣髴僧繇道子聊丹鉛問君高蹈在何處半  
城半市皆林泉我亦愛閒閒未足灰頭土面枯木  
禪披圖相見却大笑是凡是聖還是賢凡夫聖賢  
皆不是乃是飲酒喫飯真神仙

山中秋夜

夜靜山空枕簟涼西風吹冷入松房將移燭處光  
搖壁乍捲簾時月滿牀蟲語淺深思堦戶葉聲高  
下想傾筐無端料理閒生事重檢韋編到履霜

挽嚴允來

隔江風惡不堪聞吹折瓊枝葉葉分酒客騎鯨嘯  
明月仙人鞭雀入重雲病龍乍蛻連環骨雛鳳初  
生出穀文剩有琴書鎖虛室時時須用古香薰

寄祝王鐸音郡守



端州古名郡形勝雄南偏羣峰列星宿近與慶雲  
連牂牁束高峽萬古流清漣桑麻徧原隰城野羅  
管絃昔有孝肅公治郡如烹鮮鐵面浣冰雪皦然  
光簡編古道誰嗣徽我公洵卓然前有龔渤海後  
有黃穎川政聲互輝映清風相後先清風一以拂  
萬彙歸陶甄一拂爲甘棠廣蔭交桑田再拂仙桃  
根華實時三千三拂及祇樹吹噓枯木禪枯禪返  
故林獨釣鶯潭煙翹首望雲物崧臺高接天日月  
見光華草木盛暄妍瓊枝垂玉露菊蕊鋪金錢采  
菊當美芹浩歌寄拳拳拜手登瀛人洪涯與偓佺  
願言保遐齡昌期五百年良田豐玉穀寸地生青  
蓮螽斯羽繩螫瓜瓞子纏綿八龍隨五馬駕言朝  
日邊延佇青雲上何人來埽門

秋抄胡觀察子樹入山見訪值余抱疴還里  
留詩而去旣歸次韻

悵別亦已久禪心漸入微偶依潭影住不與岫雲  
飛望遠倚枯樹臨流浣破衣空勞枉相問孤雀未  
曾歸



履歷堂詩集 卷一  
扶病入林去江干詠伐檀坐深難出定骨老易知  
寒遠水疑無浪微雲似有巒何時重過此梅雪白  
成團

用前韻畬毛居士見寄

真契無疎密詩情見細微畱將陽雪曲去後繞梁  
飛入谷誰陪杖登峰獨振衣神交在茲夕覓夢故  
山歸

江樹點丹壑黃花老石壇昨來無地主重到又天  
寒雪後開三徑雲中露一巒此間有懸榻相望月  
團團

贈崔岫比丘

鷓鴣在林鶯在梁有崔有崔何昂藏雜華林裏啄  
金粟養成毛羽生輝光雞羣獨立自矜惜清聲逸  
韻凌高蒼主人恩重異常數雕飾樊籠豐稻梁日  
視雲漢不回顧奮飛直入水雲鄉水雲明月交掩  
映幽棲隻影蘆花旁蘆花水月渾一色皎潔不辨  
冰與霜旁人要識崔來去遙指蓬壺最高處不願  
乘軒入國門但願排雲破煙霧同儕羽族莫生瞋



異類披毛休見妒晚成丹頂可如何相將飛上閭  
浮樹不妨笑殺老衰翁懸鼓銜山天已暮

辛卯年十月朔子半夢手執枯木杖杖頭忽  
拆一縫縫中發生新萌菁葱可愛俄成枝  
葉葉如桃柳驚訝而覺詩以紀之

皮膚剝盡獨昂昂體露金風絕覆藏道在無生生  
意足春歸如客客情長刪枝落節尋常事接木移  
花次第將却笑癡人頻說夢漫將枯槁接羣芳

壽女近事

北堂萱草日光輝白業清齋願不違教子揚名身  
尙健抱孫行樂步如飛胡麻分作齋僧飯霞帔將  
爲禮佛衣好去瑤池問王母仙桃成熟飽將歸

挽海幢雲菴和尚

嗟哉吾道之窮也魚目混珠金博瓦擎拳豎拂滿  
諸夏順風逆風走牛馬何如海幢古佛雲尊者一  
切有爲無取捨心周沙界混朝野身入紅塵絕沾  
惹我曾過公木蘭架蘭香飛出牙齒罅公會過我  
鷲潭舍潭光深入蒲團話有時嘆世起悲詫熱血



一腔淚盈把有時玩世作聾啞遊戲場中自瀟灑  
有時註經弘佛化傳入長安紙增價有時吟咏祖  
風雅陽春白雪知音寡一繩引木支大廈八十年  
來成話榻隨順世緣無礙望南泉鼓笛由人打彫  
文刻鏤徵圖書錦上添花致純嘏請師住世啓爐  
冶金剛不壞成般若胡爲乎忽哉覩史花冠色萎  
謝雲崩日落天長夜慧命懸絲疇許借江河汨汨  
流日下鼎湖自秣且不暇何暇爲君勸廻駕羅浮  
樵訶訶罷罷薪盡火傳都是假

莫忠州孝廉見寄會和送行兼寄定襄王晉

予明府一韻三首

一別忠州已二年重來點檢帝京篇經過羊石逢  
新識取次鶯潭問嬾禪知有奇香通臭味何勞書  
札枉言詮公車無計遙相送願作朱雲覆白顛  
寒江江上泊魚船船上烹魚見雪篇強起報書無  
足道年來因病罷參禪一卷頑石成堅癖半部楞  
嚴費解詮夙習破除除未得故人休笑米家顛  
珍重報書王大令沈吟伸紙不成篇寒氈煖帽思



良友去年定襄遠書寄惠細雨微風老此禪日暮賣癡頻損  
價天明說夢不堪詮定襄相見如相問應笑東礁  
老更顛

閒居漫興

水面雲來不放歸和煙帶雨鎖重扉饕飮茶笋兒  
童瘦饕餮魚蝦鶴鶴肥桂蠹緘瓶防滲漏桃蟲鍛  
羽懲拚飛長拋筆硯無他事曝背中庭補衲衣

三韓柯子純徐蓋臣諸子過大通分賦用壁

間韻

好友相過逼暮年奚囊如斗筆如椽吟殘野馬牕  
間日打破醯雞齏菜天几案積逋風雅債蒲團默  
坐淨名禪三又七步吾何有縮首茶瓢茗椀邊

早起書事

百衲蒙頭到五更外邊明相未分明經筵梵語兼  
華語槽廠鐘聲雜鼓聲老逐夜來催日短心隨水  
去任渠成文逋幾日還將盡門掩梅花氣味清

辛卯除夕

日暮塗窮客未歸東鳥西織不停機窮神屢送情



難遣癡貨高懸售者稀  
移影就光因燭短  
露筋纏骨借綿肥  
曲肱睡到明年去  
一任三彭說是非

壬辰元旦

新年風雨舊年僧  
緊閉松牕自寢興  
春似有情先破臘  
水非無骨早成冰  
雄雞荅響隨清梵  
白鳥求聲集古藤  
何事祝筵無法說  
怕將名字入傳燈

送洪伯高帆海

讀盡古今詩與書  
不循行墨稱腐儒  
識盡世間賢與愚  
不同若輩徒守株  
捨盡檀門金與珠  
不從福報爭錙銖  
遊盡海山蓬與壺  
不隨儔伍交馳驅  
眼中之人誰與俱  
洪君伯高天下無  
挾山超海如自如  
乘風破浪趨亦趨  
輕舟重載供所需  
莊嚴佛土黃金鋪  
賢勞不有功不居  
從容談笑遵前途  
春風三月柳眼舒  
挂帆秉舵如操觚  
得心應手無拘迂  
十洲三島皆亨衢  
文犀大貝珍璠璣  
如取如攜優有餘  
長歌短歌歌歸與  
有人引領翹首於  
蒹葭秋水之間  
大通煙雨之廬

贈李秀山五十一詩



濠上觀魚君與我溪邊放雀我逢君東林池上三生石粵秀山頭一片雲取足全身歸至道何須五十笑無聞三多五福皆成幻過量如君勿復云

贈何赤木廣文

西圃先生心自閒登瀛身寄列仙班今來齋署鄰羊石爭似園林接鳳山作宦豈爲溫飽計懷人長在水雲間何由許作居亭雀地主之官爲守關  
冑學台州老鄭虔終朝兀兀守枯瓊初開絳帳環橋外又泛蒲觴粵海邊白業兼修應到社青雲任運正當年相門畱得清風在定譜南薰入五絃  
想到清齋興可乘雲山當牖翠層層盃中雪茗消煩暑盤底晶鹽飯野僧擲地有聲知好句擁書無語識良朋商量破格尋君去重過鶯潭恐不能

題石廣文匪今雅集圖

最初一片淨白紙無人無物無山水無端點綴入膠青畫蛇添足龍安耳無中生有幻中真真幻有無俱妙理墨池瀉作千頃波筆峰突出雙峰峙虬  
枝倚壁虹飲川翠篠穿雲花絢綺朱欄碧甃互參



差蒼苔白石無塵滓地迴羣囂靜入禪天空一碧  
清如洗問誰於此作居亭靈駉主人石外史主人  
厭享清福多分與時賢稀見喜殷勤折柬速嘉賓  
意中之人舊鄉里異世同堂簡送迎聲應氣求忘  
彼已過橋佳客牛醫兒手抱朱絃古焦尾池上花  
開見古人光風霽月濂溪子行窩先生何處來蘭  
室真香契精髓有人把卷料牙籤白衣宰相鄴侯  
李赤松老友辟穀仙圮橋黃石長相倚籃輿郟下  
漉酒巾阿誰醉倒東籬底主人速客客畢集滌茗  
焚香更翹企彌陀慈氏現應身文殊普賢事遊戲  
賓主有主主中賓是則是矣似未似石外史石外  
史古今變幻皆如此不來而來來不來匪今斯今  
今亦匪東樵冷眼屬旁觀未敢大呼呼卽起不恨  
我不見古人但恨古人不見我爾

彭艾菴觀察過訪出感懷詩見示次和

破屋塵封草不除居諸無幾且歸歟文逋山積將  
焚券慧業株連又著書有客渡江忘遠近故人滿  
座失親疎使君欲問年來事笑指江雲自卷舒



造物平分福未慳兒童隨侍得餘閒  
餅花插上添新水案紙偷來寫遠山  
禁足却防泥裏刺吹毛難隱肋邊癩  
煩君方便逢人說昨日東樵今倍頑  
青柰黃梅紅荔枝酸甜苦辣總隨宜  
有何不足君休笑若問其餘我自  
知雨後泥濘雙蠟屐門前町疇一  
枰棋舊遊驄馬如相過豆麥將收未  
可馳

贈楊潔溪

家近浮丘仙與羣紅塵白業此中分  
棋聲敲碎花邊日琴響遏低牕外雲  
清磬一聲珠一轉朱顏微笑酒微醺  
潔溪潔處遙相憶十里荷香遠近聞

初秋梁中祕茂山偕許馨璽麥仲詒  
嚴靜功諸子集大通茶話至夕移棹  
過仲詒槎軒

小飲分賦見寄次韻

咫尺江城路未遙入林攜手不須招  
尋僧道話兼詩話畱客茶瓢當酒瓢  
爲愛晚涼移野渡更乘餘興醉書寮  
多君好句勞相贈吟向空齋慰寂寥

題畫

孤峰千仞削絕壁蒼松撐空高百尺  
溪山溪處無



人迹不是方壺是始射  
飛泉直瀉千峰高松風轉  
齧成波濤洗心洗耳聽  
不徹秋光一碧歸霜毫

奮俞桐石見過韻

舊識郎君鬢似鴉重來蒼艾未還家  
途窮忍效狂夫泣世難徒深國士嗟  
直道真難容展季下車誰復問西華  
勞君好句先施我媿乏瓊琚報木瓜

病中放舟過霍璧章江樓賦贈

捧腹尋良覲乘潮放小舟花邊坐禪處  
江上讀書樓眼曠乾坤闊天空日月浮  
當中懸一榻容我再來否

元日壽張北山

大人大力媿吾曹撐拄門庭不憚勞  
撫拾百家無遠近公私千載絕淆聳  
鄉心不繫雙腮鱗壯志長搯六足鼈  
揆勝名山隨杖履儻居荒寺任蓬蒿  
著書禿盡山中兔繼晷焚將午夜膏  
篋裏雄文今董賈囊中佳句老風騷  
六經鼓吹憑標榜萬古徽猷仗建馨  
媚澤輝山珠照乘遷喬出谷鶴鳴皋  
遙知



上國懸金購頓覺長安紙價高玉振金聲新琬琰  
家傳戶誦古雲璈鷄壇赤幟留青眼藻鑑芝眉見  
白毫虎觀經生身未老鳳樓哲匠手經操欣逢獻  
歲懸弧矢聞說招賓飲濁醪野老江干瞻瑞氣春  
光天上醉仙桃題詩珍重憑雙鯉罷釣相將放小  
舠三教一家君與我何妨縫掖伴方袍

舟中送賈鵬使青南順道還山閣淺候潮卽

事書懷十絕

剗得扁舟學釣魚蘆花淺水足安居無端浪迹隨  
流去坎止盈虛不自如  
歲暮方思返故山更隨迎送到人間寒潮有信無  
消息沙嘴空留片石頑

江河日下水奔流玉借岡邊狎野鷗莫道忘機能  
利涉前船重載阻輕舟

蒙茸縕被破袈裟緊閉蓬牕閣淺沙強起推篷看  
晴雪鼎湖山色在天涯  
返照推開白板牕隔江遙望碧油幢先春求友鶯  
千轉衝雪銜魚雀一雙



兒童學種水仙花帶水沾泥選白沙若解吾宗蔬  
笋美臨淵無復羨魚蝦  
鄰舟燈火夜猜拳始憶今宵是小年家在雲山不  
歸去爆聲飛入枕頭邊  
從來吾道信艱難鉢覓無顏謁長官珠桂關心禪  
定廢朝來舉箸不能餐

時方饑饉

蒸沙作飯老無成畫粥分餐過此生若使白沙成  
白粲二千餘指飽彭亨

想到家山日已西亂峰溪處鷓鴣啼無由汲得西  
江水洗我歸僧脚板泥

壬辰臘月珠江鄭太史將有姑蘇之行暮過  
大通剪燭話別拉予偕行心已許之因筮

中止送之以詩予將卜築鹿湖待公之還

珠江過我破殘臘話盡寒燈風颯颯明朝額上看  
梅花相約苾鞋伴珠鞞臨行問我行不行我已畲  
君君未畲沉吟半晌復尋思起來再拜肅著龜著  
龜似笑趙州老八十行脚斯何時匡君之廬在天  
上欲去未到心先歸虎丘高高君且去鹿湖溪溪



我當住一閒泥屋兩片茅三個柴頭半椽芋淺撥  
溪煨待阿誰十年宰相須回顧好回顧有人守株  
長待兔擬向邯鄲學步趨却愁岐路還岐路

詠蚨錢

愛此自不俗因之疑有神常為知己用暫與市兒  
親撲滿留難住空囊澀不貧本來惟血性出入豈  
依人

東閣觀梅有懷何水部

青螺何氏社集詩

邗溝斜日澣征塵東閣寒香在隔鄰撫景恰如三  
過客看花猶有再來人吟成雪曲無今古占盡風  
光自主賓為報當年何水部青螺風雅一家春

贈風讀史

牀頭燈照史洛誦復高歌涇渭五情熱滄桑一笑  
過寸心柳子大尺籍蠹魚多寂莫風簷下咕咕奈  
若何

看劍

社詩

拂拭方知躍冶年原來便是古龍泉用如無用光  
照地平盡不平飛上天三尺凍雲愁鬼泣一泓秋



水渴蛟眠牀頭得此生顏色俗物何須到眼邊

庾關春望四首 社詩

絕嶠東風撲面吹弊裘羸馬到家遲天鷄啼破扶

桑日關吏不來書贈誰

叱馭樓頭新柳垂燕鴻來往兩差池風光如此不

歸去回首斜陽已半規

凱風拂拂柳絲絲古寺雲封暗路岐額上梅花三

百樹一時盡發向南枝

度額難忘鑿額時曲江終古有遐思上林昨夜花

開徧借問行人那得知

兩虎行

遊子久不歸言歸問封樹荆棘集泉扉蹄迹盈道

路路逢白髮翁倉皇久舉措長揖問寒溫吞聲如

有訴攜手共入林坐定還恐怖旁睇四無人耳語

防暴露具陳薄俗風今來非復故百憂起蕭牆一

穴踞兩虎去臘虎爭穴噤哇達公府感激神明君

玉趾為親舉臨穴縛其一投彼江之滸一虎獨專

穴施勞示虢武羣狐假其威出入成黨與弱血恣



強食獲噬莫敢拒順命獲噓濡失權就湯釜怡懌  
如相酬相矛與外侮賢貴不敢言愚賤懷憂懼亭  
午閉荆扉邨煙冷豐蔀天高白日昏地迴哀聲聚  
附耳語未終涕泣零如雨側耳聞所聞掩耳去未  
去近無周子隱還思范叔度安得有力人鞭驅還  
故宇願言牖其衷願言滌其慮願言安爾居願言  
從所務丘墓復埽除閭閻復安堵田宅復耕桑絃  
歌復朝暮物理有循環悵然獨延佇

挽黃葵邨

老馬當歸不用鞭輸君神駿獨爭先居亭到處尋  
權伯寓墓何人葬酒泉殘月曉風楊柳岸長歌短  
曲水雲邊道人不是無情者一把遺篇一愴然

挽何孟門

漫將世眼視高賢同睽方知被底穿自是文章憎  
命達何妨學究會談禪蓋棺定論惟今日躍冶休  
心凡幾年欲買扁舟到羊額拾君遺草蠹魚邊

廣州陳廣文元夕後一日慶生寄祝

仙才吏隱氣巖巖豈遜猶龍柱下聃十郡師儒推



首領三遷文教振東南月當燈後還持滿酒酌花  
邊戒止貪幾欲登堂獻華祝春風遙隔白鷺潭

晚年與鄭珠江太史爲方外遊嘗過其門門  
前古松盤根高節輪菌離竒竝坐其下神  
交心契恍成三人擬作長歌得首二句未  
暢厥旨寘之有待也癸巳春郎君汝孝以  
聖壽特科領薦鄉書予忝平生之愛不免隨  
喜思有所贈未能免俗偶憶前日古松起  
句足而成篇聊致相期之意

太史門前老松樹穿天拄地根盤固松閒一鳳生  
兩雛九苞五色文章具 聖人萬歲松千歲老鳳  
三春養儀羽大雛飛上五雲端直指天門問天路  
下方百鳥鳴啾啾仰首相看復相慕山中野鶴水  
中鷗竝集鷺潭相對語吾儕日與禿鷺野鷺鎮相  
隨何似鷺鷺卽都諧律呂老松鼓掌笑呵呵大枝  
小枝爭起舞易不云乎雲從龍風從虎聖人作萬  
物覩吾於斯言乎而有取

送天都永圖還里

公高涼太守仲父其行也  
奉太守太夫人歸廣陵



君不見東山二謝賭弈枰談笑却走符秦兵君不  
見竹林二阮違世情嘯歌互奮清風生君不見天  
都二吳致治平相助爲理揚家聲古今賢達信不  
少出處隱顯皆髦英何如同氣復同志鳳雛應運  
黃河清高涼古郡在天末地偏土滿民伊嚶郎署  
拜恩乘五馬熊軒夙駕將南征顧瞻周道甫發軔  
徘徊孤掌難獨鳴先生牖下事甘旨愛日爲重三  
公輕仲容造室致羔幣北堂有命何叮嚀男兒落  
地期致達守株豈似扶搖程安陽捧檄爲親屈仲  
由負米權可承先生受命別鄉井門閭在望心懸  
旌回首栝椽厯明發四方有志煩經營黃堂主人  
今處默貪泉題破嗣芳馨贊勳蓮幕資大阮坐鎮  
雅俗推延陵延陵歷聘不遑處朝隨翟第歸蕪城  
蒲帆高挂出珠海海濱漁父權相迎殷勤借問客  
何去長歌遙指竹西亭老漁鼓枻奮清響一曲滄  
浪君且聽滄浪可清還可濁我當濯足君濯纓歸  
去來歸去來黃山白嶽臨戶庭拂拭瑤琴對流水  
鍾期去後徒錚錚山有榛隰有苓傾筐采采供湘



烹果腹搯頤矚天宇意中之人潘茂名緘書款款  
託青鳥仙坡客去少人行不妨記得重來約遲爾  
風雲上 帝京

送劉蓮溪隨賈鹽使歸河間

河梁晴雪錦帆開李郭同舟識雋才油幕居亭今  
董賈蓮池賓從老宗雷星迴斗柄針南指路轉衡  
陽鴈北回取次春風伴行李有人先擬築金臺

饑歲放言

懶學操瓢謁長官日陪菜色上蒲團漢芝采采終

難飽周粟明明不易餐饑畫餅來窮措大渴談梅  
去老寒酸粟瓶叩作錚錚韻只許聞聲不許看  
暗捫泥壁寫新題墟里烟銷日已西隔宿糟糠喧  
鼠婦鄰家米桶有寒妻塵埃收拾歸空甌囊橐盈  
虛問小奚藉口安貧吾豈敢笑拈黃葉止兒啼  
三篋支吾飽與饑十圍消息瘦還肥輕身羽化成  
仙去枵腹心空及第歸顏巷簞瓢榮叟索於陵井  
李首山薇古來不少休糧法按籍抄方靜掩扉  
結束繩樞晝不開痴心雨粟自天來半升糠屑食



輪轉三個柴頭品字煨犬瘦主羞眠傍榻貓饑鼠  
飽舞當臺外邊物理應無別咄咄書空日幾回  
饑歲園荒水浸廚窺園町曠變潢汙陳根委翳無  
兼味野菜郎當共一盃蚯蚓但知齊仲子遊魚偏  
愛范萊蕪吾宗絕粒尋常事麻麥家風記得無

壽東湖天公週甲

退院歸來便掩關蓼莪章句早須刪現前壽佛有  
人在若個聲聞似我頑二九破家人未老八旬行  
脚路多艱偷開北牖施三拜慧日當中看轉環

見說虞園鬧似然祝延緇素日紛紛現身說法說  
何說側耳聞聲聞未聞風度齋鐘知午餽涼生殿  
角想南薰無由得逐賓盧後聊寫新詩寄五雲  
莫管干支去復周現成公案古徽猷一雙嫩桂今  
祇樹兩個東湖老趙州柱下傳家應後起落伽成  
道有來由燃燈一會分明在借問陀天記得否

入十謝介白過寺見贈次韻

青苔碧蘚鎖溪橋風墮松釵野火燒遶徑草花開  
復落當門潮信長還消江城客過心偏遠雲頂僧



歸興倍饒煙雨迷津催返棹更留清話在他宵

題蘇東源行樂小影

八十之翁三尺之童童心未老壯志猶雄其氣如  
虹其步如風其勁節如淇園之竹其壽考如梁甫  
之松常寘閒身於多事無閒之外或持公論於物  
論不齊之中彼何人斯昔年際起將際時而奮起  
今號東源欲溯源於邨東且道昔同今異昔異今  
同也不異也不同此去慈溪無幾幾碧溪溪畔理  
漁筒

送臨高樊明府歸田

并序

潛菴樊明府宰臨高十年大有政聲曾過大通  
破院一見知爲神仙吏隱非五斗可屈者同時  
在座番禺令公姚樂昌令公許諸公皆卓然自  
命也坐定索書得案頭宋史各取一冊倚窓展  
閱閱畢一笑散去未及深談別後有詩寄贈云  
久拋繩檢事漁竿老病支離磬折難按定古方  
醫錮疾高臺時價賣心肝門維官舫驚鷗夢詩  
括奚囊挂馬鞍就索殘書消永日清風吹起蠹



魚乾詩成留稿待呈思仰如一日癸巳夏謝鼎  
湖院事東歸大通養痾林下得明府惠書始知  
因病在告俶裝歸里有日矣予方掩關謝客未  
能出餞漫賦短歌用志神交  
臨高因病謝官職歸作江都老詩伯鼎湖因病辭  
法席依舊鶯潭釣魚客二人出處如轉環因怵得  
病病得閒造物主人秉銓軸掣籤美缺皆天山多  
情二豎信良友相送入林便分手從茲心快身亦  
輕勿藥有喜貞無咎莫笑長官貧奚囊大如斗莫  
笑老僧貧嶺雪携滿袖探囊拂袖笑一聲窮兒暴  
富君知否君知否世人所有君獨無世人所無君  
盡有

題上官文佐煙村行樂圖

夜來夢想住空谷煙雨瀟瀟數茅屋屋角蒹葭間  
叢菊屋外清溪接漩湫東岼水清西岼濁臨流可  
漱亦可浴扁舟泊近蘆花曲往來不繫無拘束鷗  
鷺同遊鶴同宿朝飛夜集羣相逐舟中默坐人如  
玉手持八尺瀟湘竹絲綸舒捲貌淵穆志不在魚



在幽獨炊煙起處飯兼粥瓦盤盛出聊克腹鼓腹  
長歌行不于天許閒人受清福出逢鄰舍皆淳俗  
雞豚徧野牛散牧刁斗不驚豺虎伏架上有書瓶  
有粟春絃夏誦冬旨蓄輟耕開卷日三復三教百  
家隨意讀日入林深呼秉燭松火代膏光歷陸興  
來落筆書簡牘著述長短任伸縮吟哦高下由斷  
續興闌擁被眠曲象一覺羲皇到朝旭起來開戶  
領童僕直向溪邊教盥沐主人抖擻理常服踏上  
漁舟操舵舳煙水蒼茫氣清淑長嘯一聲萬事足  
旣得隴休望蜀癡人妄想無專屬卽幻卽真如轉  
轂朝來有客貽尺幅索取留題表芳躅善哉妙技  
非碌碌先得吾心所大欲對景寫真真面目不辨  
芴觀與當局按圖覲面凝睇矚恍惚斯人曾面熟  
厥名曰周字文佐長汀杜官其里族

將適高涼先報郡守吳丹山二首

出谷曾陪五馬車別來踪迹混樵漁乍逢銀鹿將  
雙鯉再拜青鸞啓尺書還坐自思陶靖節問津休  
遇老長沮天風許與閒雲便應逐飛蓬返太初



每從豐蔀矚星雲霄漢泥塗兩地分一鳳鳴岡諧  
律呂六鰲奠極應風雲高涼赤子依慈母嶺海蒼  
生仰使君願得把茆棲宇下不妨人諷北山文

寄羅廣文戒軒

常時記得平生約許我誅茅近石城世路無聊期  
共隱坑田雖瘦也須耕蹉跎歲月將焉往方便因  
緣在此行假道高涼秋未老建山明月爲誰明

別意外堂

意外棲遲不記年意中無意但隨緣家山一入身  
空老城市頻來興索然借宿鳥窠尋舊夢撥開牛  
糞起朝煙風光如此不休歇又向河頭問渡船

別珠江太史

船頭西去水東南延佇河梁待盍簪多謝珠江老  
漁父獨移蘭櫂過鷺潭花邊稚子爭碁罷林下伊  
人坐石談子欲無言君也會靈山不負舊同叅

別鹿湖寄鄭虛舟明府  
天邊帆影路旁塵去住原來只此身雲岫過空無  
一片草鞵行脚有三斤山方九仞止吾止菊別重



陽新日新幾度鹿湖虛宿諾早完茅屋待歸人

大慶別鼎湖

羅隱橋邊不繫舟鼎湖回首悵凝眸草鞋獨往孤  
踪遠桐葉初飄萬木秋亂語聚蟲依舊榻低巢移  
鳥近書樓後來不少居亭者還我閒房待首丘

泊新橋

歲儉人稀屋數間雨頽沙岸水移灣迷津恰似初  
來客覲面如逢舊識山戍鼓遠聞蛙鼓應波光分  
帶月光還新橋風景今猶昨橋上行人若箇閒

舟過峒口有懷故人李方水潘玄子

衰年浪迹類浮萍前路都忘熟與生作客頻過官  
峒口懷人長憶古筠城安仁舊宅珠林近柱史遺  
風鐵笛清惆悵故交零落盡不應寒却白鷗盟

京下河頭遇風口占

風沙雨箭打船頭人自驚心水自流我本無心隨  
去住石尤不用觸虛舟

車印

水作銀河浪作花急湍匆轉五牛車狂瀾豈有安



身地砥柱中流未可誇

舟中卽事

兩片蓬窓一半開  
靜觀鷗宿想浮杯  
雨餘涼駛開  
懷納風遞灘湍聒耳來  
東岸漁歌西岸笛  
上方雲氣下方雷  
虛無想像蒹葭外  
何處迷津可溯洄

泊河頭懷故山

慣識河頭路深慙出世兒  
椰榆山鬼笑三復碩人  
詩寺遠鐘隨耳山高月印籬不妨雲頂上別後有  
餘思

中火初至大峒山作

開山主人積慧比丘雲頂眷屬

耳聞大峒心先往身到鼉陽興倍高堂構依稀雲  
頂寺淵源先後峒山曹雛烏學語依雙樹老鶴求  
聲出九皋白髮如絲初到社那堪塵土駭方袍

扁扁宿五藍

五藍記得經過處  
幾片茆茨覆土牆  
竹榻低鋪檐接膝  
松燈分照雨連床  
故山漸遠官亭近  
歲月無多客路長  
臨老未酬茆屋債  
夢中如在水雲鄉  
宿電白官邸有懷故廣文何繪閣



雨餘山路少人行假道停居電白城官店晚煙殘  
宿食荒郊斜日役車聲西風鐵笛神交遠東海金  
仙羽化輕記得當年何學博不堪回首問浮生  
題湯泉寺壁呈吳大夫

氤氳一氣布炎荒不待薪傳沸似湯禪悅自能忘  
冷煖人情未免有炎涼運移火宅連冰井挹注陽  
和出上方但得此心如浣雪熱中寧待倚銀床  
香水靈根陸地栽方諸陽燄毓胚胎長留大冶爐  
中火不燼昆明劫外灰舍瑟便同沂水浴振衣疑

向博山來相逢漫說寒溫話直探源頭縹緲回  
山色蒼茫氣鬱葱波光脈脈雨濛濛誰知造化吹  
噓力盡在乾坤澹蕩中火德無私三昧印陽春有  
脚萬方同自從題破貪泉後凍谷南薰草偃風

望海樓古刹

停車古寺一盤桓萬里風雲咫尺看老去不知滄  
海變途窮方信路行難連林墜葉驚霜早獨樹盤  
根待歲寒最羨放雞山下叟半間茆屋一漁竿

寺前海島孤峯獨峙山名放  
雞聞有老僧隱此結句及之



廬山詩集卷一  
全  
荅馬英眉見贈

會聞馬帳傳經學前列諸生後女樂風流儒雅亦  
吾師古往今來誰述作雲間夫子洵卓然羽中威  
鳳羣中鶴三年不飛飛翀天三年不鳴鳴驚人胡  
爲乎臯座郡齋覺後覺我知之矣宇宙之大何所  
不有鳶飛魚躍皆真樂調羹用爾作鹽梅天將以  
子爲木鐸我來一見快平生三教陳言皆註脚美  
人贈我醅與醕何以報之酥與酪酥酪醅醕一味  
同長歌共訂燈邊諾

高涼郡齋壁上雙松歌

深山古松高百尺風霜不改真顏色無端移向郡  
齋頭勁節低垂倚牆壁大枝俯就小枝隨左幹橫  
斜右幹直上有流蘇斗帳之承塵下有嶙峋磊砢  
之磐石仰觀雲漢天宇低曠懷宇宙藩籬逼古松  
古松奈若何遺却真踪存幻迹五馬大夫清且高  
盤根錯節濡毫墨繪圖寫影不寫真神交可望不  
可卽古松在茲不在茲南山之南北山北

寓郡齋荅吳大夫見贈原韻



衝破雞聲宿霧開  
一逢岐路一低徊  
居亭下榻遲  
飛錫浮海乘桴想  
渡杯閉閣放衙羣  
吏散曳裾拱  
手有人來揚州何  
遜遙相見惟問添  
栽幾樹梅  
初秋雜詠和吳大夫韻  
老貌年來漸失真  
新秋微露舊丰神  
高涼爽氣清  
如水洗我眉間五  
斗塵

半日晴陰半夜寒  
半天涼月半床看  
倦來夢入鷺  
潭去長嘯一聲投  
釣竿

抖擻枯腸一字無  
奚囊詩債日追呼  
行吟不欲循  
牆壁七尺交藤強  
自扶

莫愁客舍無聲氣  
聲在芭蕉氣在蘭  
宿雨洗開西  
岫塔連雲送入遠  
山巒

晚晴和吳大夫韻

雨歇風鳴響屨廊  
行吟花氣壓垂堂  
秋空淨抹一  
痕碧返照斜侵薜  
荔牆

道心寂寞遠雲霄  
悟人風幡不動搖  
七字吟成無  
一字隔牆何處沸  
笙簫

秋夜陪吳大夫步月



我心似明月明月本無心清光滿天地城市卽山  
林白露冷紅燭金風鳴玉琴相期形影外閒步桂  
花陰

祝高涼大夫壽母李太夫人

問政山頭氣鬱葱宜男花發蕊珠宮外家道德函  
關祕東閣文章嶰谷筒靈藥養成丹竈火冰壺留  
在竹屏風母儀壽域循良績棠樹清陰處處同  
南國仙人萼綠華近依潘井煮丹砂承權菽水二  
千石飽德壺漿幾萬家紫綬金章宜彩服玉堂銀

榜拜黃麻臺山路上留僧飯不羨瑤池棗似瓜  
瑤池仙宴屬今朝婉姸麻姑折柬招三宿彩蟾開  
寶鏡淡旬靈鵲駕仙橋參苓曾賜身長健繡幃重  
來國可譙我在郡齋翹首望婺星輝映斗旋杓

秋郊

次吳大夫韻

極目平蕪野色明秋光點綴入詩情天空碧落雲  
容薄地隔紅塵井脈清山驛水程遙甸線樵歌牧  
笛興縱橫問津直到迷津處坐對閒鷗訂夙盟

贈吳啓公



郡齋揮麈緒風輕識得元方難弟兄  
羯末封胡東道主玠璘拱挺舊家聲  
西園玉樹連枝秀東閣梅花挹露清  
信宿高涼共涼月秋光何地不分明

荅吳琢軒見贈原韻

躍冶新礪未有涯期君秋實在春華  
獅開雲路須奇翼撞破煙樓羨作家  
澤媚山輝滄海日珠圓玉潤赤城霞  
汪波千頃文瀾濶爭怪山人老眼花

荅吳淮武公子見贈原韻

翩翩公子賦閒居帶草當堵竹繞廬  
花發一揮江令筆日高頻晒孝先書  
行吟金石鳴珠鞞戲舞爛熳映豹裾  
珍重新詩勞見示凌雲真不媿相如

容至又和前韻述懷

煩君方便爲吹噓容我尋山小結廬  
雲外數聲無孔笛案頭三藏未焚書  
天教霜色來欺鬢風褪荷衣笑曳裾  
欲借一枝棲得否高翔寥廓謂何如

和馬英眉見贈長篇同韻留別

我居住近浮丘麓門對濂泉千尺瀑  
苔緣碣篆人迹稀松挂虬枝古藤束  
相將匿影送餘生刻鵠不



歲尙類鶩無端假道入高涼  
熟路漸生生路熟朝  
辭珠海日出東故山回憶秋芙蓉芙蓉日暮低顏  
色桑榆扶醉騎蒼龍昨日新涼正徂夏花開未免  
賞花者山翁大笑行出門一葉輕舟波上下平生  
得力逍遙遊無心到處皆虛舟河頭風急水如箭  
不管安流與逆流孤琴獨抱山水志地主開軒狂  
客至馬帷釋業笑相迎談諧直到紅輪墜旁人問  
客何處來非城非野非蓬萊浮生尙剩半規日浪  
跡聊隨一渡杯行行且住坐還臥去去未到心先  
回和詩留別硯北客再待逢君笑口開

寓郡齋吳瑤圃作枯木禪小影并詩見贈次

和

恰好把茆依老樹羸他滿壁畫滄洲蒲園榻地空  
留影葉落歸根始覺秋竹色幾曾離屋角笑聲從  
不過橋頭殷勤寄語吳道子爲我旁添水牯牛

宿漕江劉氏書堂

劉向傳經地漕江江上峯堂開青嶂合門掩白雲  
封流水本無住深山何處逢明朝回首望烟火隔



重重

曹江嶺與吳瑤圃坐月

秋空有涼月遠水流清光形影自相見高深無短  
長禪機一以默腹笥寧深藏話到月光盡別君歸

艸堂

宿吳瑤圃山亭

我來此亭上喧寂此中分山色晚來近人聲高處  
聞添燈續殘月捲幔送行雲明發高涼北言尋麋  
鹿羣

曉發漕江

乘輿入高涼朝煙宿莽蒼山隨車馬去天與水雲  
長老樹心先死秋花晚更香蒲園留不住到處問  
僧房

高涼山紀遊

我聞高涼山乃在高涼境郡以山得名山爲郡作  
屏當年錦繖封終古留名勝山澤一氣通高深羣  
象正夾石捍重扉澄潭涵古鏡初至但髣髴漸入  
通溟濔空谷來足音荒菴寄高迴卉木互交加藤



梢觸衣領路狹溪聲長地僻塵埃淨炎夏似涼秋  
亭午渾朝暝林隙仰窺天天空過雲影我來信杖  
藜僧出鳴清磬竝坐兩無言一笑發深省野人有  
好懷真率無畦町竹筧瀘新泉地爐瀹春茗一縷  
山廚煙晴嵐紛掩映栗房琥珀香芋屋鍬鉏秉瓦  
盤盛菜羹棘七薦湯餅一飽腹便便賓從胥平等  
行吟鳥和歌長嘯谷響應浣嗽溯流泉淵源出仙  
井撥草尋虎溪山光開鷺嶺片石鎖雲根巨靈護  
神鼎拂拭舊煙霞鞭驅頑躑躅願得半把茆覆我  
青螺頂歸來語良覲寤寐懷欣慶名山信有靈吾  
生隨定命長歌紀勝遊再來待乘興

大辨郡齋中秋

原來隔壁是人家蟋蟀聲邊羯鼓搗到處中秋有  
明月不分僧舍與官衙孤吟倚竹旁添影老眼挑  
燈近見花擬向邯鄲乞仙枕卽今還我舊煙霞  
煙霞過眼卽迷方去住關心老更忙七十七年成  
底事千山千水宿他鄉夢回祇覺光生牖睡起方  
知月滿床笑引明蟾作明鏡影邊無那有繁霜



將返故山馬英眉贈詩次韻留別

行雲流水不離山  
光影隨身去住閒  
雲與水光相掩映  
水拖雲影自潺湲  
心同駟馬晨先發  
目竝雙扉夜不關  
珍重新詩勞見贈  
輕車載得百朋還

晤端州宋大夫端齋偕遊鼎湖賦呈四律

南來五馬八風清  
手奉天書出玉京  
家學孔庭傳大維  
相門伊陟紹阿衡  
下車早慰雲霓望  
吹律遙看黍谷生  
許我山人聽琴入  
一聲聲徹梵王城

梵王城在鼎湖中  
端水西來鷓首東  
出岫閒雲隨驥尾  
遷喬鳴鳥和詩筒  
遠山更上層樓眺  
飛瀑遙尋細路通  
珍重磨崖留綠字  
煙霞籠當碧紗籠

三瞻四顧一沈吟  
想見伊人物外心  
儒雅吾將師

宋玉文章人盡識  
陳琳虎符早剖恢  
遊刃龍鍔新  
礪利斷金咫尺  
羚羊高峽水好分  
涓滴及珠林

繡豸蒲輪下紫微  
岱宗翹首仰清輝  
西園取次盈珠鞞  
東閣相將待絳帷  
白社久虛玄度席  
黃堂新製老萊衣  
郡齋自是陽春地  
應許巴人和曲歸

題姚二曾痛飲讀騷小影



壯懷俠骨傲風塵萬斛愁消五斗春此意在騷不  
在酒靈均原是獨醒人

退院後郡守宋端齋大夫約遊鼎湖隨還舊  
社承惠詩次和四首

秋老林空雲掩關久無車馬到溪山偶陪使節傳  
呼入策起僧禪寂寞間隔座樺香留客話滿庭竹  
色待人閒明朝叱馭紅塵外應笑天湖草草攀  
卿雲五色絢晴空移向千巖萬壑中翠竹黃花留  
逸韻啼猿鳴鶴詠清風虛將衆竅聞三籟譜得新

詞叶九宮七字長城千里郡南人從此仰宗公

騷壇九辨得家傳遊刃聊烹大國鮮白雪陽春推  
作者黃鐘瓦釜笑詩禪緣山聽瀑停珠履藉草班  
荆當玳筵金馬恢諧今曩倩登瀛還擬挾飛仙

象王兔徑爲誰容掛角羚羊寄习踪詩興多從遊  
興發宦情爭似野情濃丹崖青嶂人知宋流水高  
山客待鍾取次開池追舊社遲君重過看芙蓉

郡守宋公飛水潭觀瀑詩末韻云神龍潛藏  
渺何許卽今苦旱方待汝何不竟挾此泉



飛徧灑人間作霖雨戲為潭龍解嘲

臣在空潭老無用潭水澄凝不思動看看大地倏  
如熱甘與枯魚眠石甕神龍高高飛上天老龍深  
深潛在淵大旱用汝作霖雨容我空潭白日眠

宋大夫尊人執政山東大夫出守解印就養

至端州日適逢覽揆人爭慶之寄呈三律

朝辭金馬罷鳴珂就養南來勝事多山色入懷琴

解語桂叢招隱鳥能歌腰離鵲印行藏便膝繞龍

駒色笑和僧老空林方退院此心應許共烟蘿

山寺纔聞車馬聲輪蹄輻輳信安城星峯棋布三

台近端水波澄九派清天轉璣衡迴短景日中部

屋見長庚萬家烟火胡麻飯散作香廚椀鉢聲

集賢家學文章貴樂聖伊人歲月長養志飲冰先

菽水解裝浮蟻竝稱觴黑頭宰相鳩為杖彩服兒

孫笏滿床賦就梅花壓徐庾廣平應不遜汾陽

灌園和東坡雨後行菜韻

白髮參差生暗與青蔬長向晚掩明鏡沿流盪雙

槳春膏布靄霰荒畦成沃壤勾萌自低垂甲坼亦



偃仰未遂傾筐盈先作克盤想造物有分子清福  
誰獨饗大烹慚老饕小摘供幽賞睠然思灌園千  
秋嗣音響肉食徒朶頤冷淘寧孤掌願言契夙心  
靈苗共培養

贈梁員外入京

龍駒飛入五雲鄉驤首天衢日月長翻笑馮唐年  
紀大三逢漢主始爲郎

黑頭宰相有人在白足禪關待客開爲報嬾殘煨  
芋熟獨留一半鄴從來

送鄭珠江太史

珠江漁父東樵樵聚首分携兩不遙來歲蓮花開  
得好遲君重過虎溪橋

送客江風撲面吹兩人霜鬢亂絲絲何堪落草盤  
桓日又作臨風悵別時  
虎丘未到又龍池臨別還君去臘詩夜半寒燈照  
肝膽前程不問問前期  
昨日高涼君送我明年春暖我思君臥龍五月渡  
瀘水爭似南陽臥隴雲



客途風雪逼殘冬幕府開軒臘酒濃南望山頭好  
南望有人翹首最高峰  
黔中萬寶勝京華如取如携老眼花報國此身須  
服食到時牢記採丹砂  
丹砂方便不妨求夜氣無心莫久留更有老松生  
琥珀持來歸與芥相投

明明古道不曾迷記得龍標下五溪我亦有心似  
明月隨君來往夜郎西

宋澂谿太翁初至端州未入境先遊鼎湖予

時退席歸林弗獲倒屣承詩見寄次韻荅  
和一律再和長歌一章用訂後緣

爲愛鶯潭水石幽鼎湖歸棹近潮頭淹留珠海三  
更月冷落祇園萬木秋白髮避人辭舊社青雲遲  
我識荊州報詩不敢誇風雅曾記當年薄貫休

長歌畲宋澂谿太翁遊山見寄

藏山于澤自今古貯待高人隨去取山僧本是寺  
家奴灑埽門庭淨塵土土曠人稀奈若何秋風吹  
老庭前樹柳標橫擔返舊林高枕鶯潭宿煙雨昨



宵恍惚山雞鳴喚起癡聾聽鐘鼓一百八聲雲頂  
來千山萬山交耳語朝來有客非等夷抽簪長嘯  
出金微一路吟詩過梅嶺逢山禮佛叅禪機郎君  
作守古端郡五馬郊迎願不違峽口移舟駐蘭漿  
湖山在望遙相思興來料理雙蠟屐直指孤峰覓  
路岐路逢小歇不甯歇攀崖突破千松圍千松圍  
處數間屋古佛端居待阿誰入門相見如相識靈  
山一會今依稀風幡動處理前話頌南獬獠將焉  
之舉頭問佛佛不語回首問僧僧不知但言我輩  
住山久饑食渴飲寒添衣出門大笑逢人說此山  
此遊來悔遲諸方盡是聰明漢今朝始識真禪癡  
長歌寄語鷺潭上笑殺鷺潭船子師

寄陳恥菴

追陪舊社識高朋吟共孤峰最上層前席居亭憑  
借箸後山詩派有傳燈鷺潭煙雨遲嘉客驢背樵  
風贈野僧翹首仙湖隔江水一聲長笑憶孫登

鄧明經俊公新製書帷出紙索書考亭四樂  
不欲踐迹漫題新句四首且致勉焉



紫蕨舒拳芹芻芽豆房拆甲蘭開丫細雨輕粘飛  
絮粉緒風靜落棠梨花斗帳四垂叢蛺蝶行廚萬  
卷籠煙霞鑽將槐火照青汗研取松煤寫白麻讀  
書之樂樂無涯織烏西飛圓景斜  
丹葩耀彩明湘簾冰盤買凍堆晶鹽紅榴吐燄苞  
垂檐奇峯倚壁雲露尖薰風拂座披緗縑荷珠浣  
手抽牙籤法味珍饅牙齒甜精萃糟粕魚掌兼讀  
書之樂樂無厭明日青霜生短髯

露華放出紅樹光霜風剪破芙蓉裳瘦骨立依  
銀床古桂魂銷離玉堂下帷秉燭人影長開軒煮  
字天花香漁獵百家歸括囊醞釀六經成報章讀  
書之樂樂無荒江河日下流湯湯

玉龍戰罷蒙朶息石虎蹲坐毘瑠璃貂裘擁出長  
安兒羊羔笑殺黨家姬塞向堽戶歌幽詩擁書南  
面凌霜威濡毫呵凍臨硯池衝寒疾走如奔騅讀  
書之樂樂無期冷煖自知疇得知

久不入國門勉應端州郡守宋大夫請信宿

而別歸林下却寄



寒江停棹畏風波勝侶追尋此暫過涉世自慙禪  
力弱入城方覺貴遊多側身三徑慙羊仲託足平

園見玉和蔣君西清周君也信宿仙湖動歸興煙

霞溪處一高歌時大夫奉公駐節會城之仙湖里

仙湖車馬去彭彭爭似天湖屐齒聲天湖即鼎湖也

兩日居亭纔一面暫時談笑即三生禪隨詩興趨

官舍忙帶閒身到郡城會記商南營杜曲崧臺從

此願歸耕宋大夫尊人澄溪翁令商南時曾營杜曲精舍招友人李雪木居之往來甚洽

未句偶起癡人踐迹之想

蚤起口占寄懷星巘諸子

東牕睡起病身閒水帶晴光盪老顏畱取烟霞同  
閉戶散分猿鶴各歸山石能得句頻移坐竹有題  
詩未忍刪回首星巘笑孤鳥無心飛去又飛還

贈戴峩峩峩峩別駕

白晳風流偉丈夫黃堂佐治握雙符茨梁沛澤操  
靈鑰斥埃波澄耀智珠遂有閒雲來遠岫偶隨明  
月入冰壺春江西泛剡溪棹得似當年訪戴無

謝戴別駕欵齋

歲步堂詩集卷一



崧臺初日啓朱扉七椀清風歛衲衣花下畱僧飽  
齋去道旁行脚帶香歸鶯方出谷欣鳴和塵可驅  
塵笑指揮一座談鋒聽未徹至今玉屑尙霏霏

題樸真堂

玉板銀題仰樸真柴桑應是再來人還淳返樸分  
華實去贗存真辨主賓木有文章憑繪綉水成波  
浪見漣淪靈山一會會相識吾道于今快有鄰

宿霍氏水亭用周冷泉韻

一棹下烟波言尋張志和維舟傍亭宿側枕聽漁  
歌老鶴獨無語野鷗閒亦過欲畱就君住無奈妓  
船何

贈謝介白

岡州謝君字介白雁翅城西長作客吟詩打破玉  
壺天大笑壺中天地窄奚囊傾出明月珠虀丸魚  
目無顏色持來過我白鷺潭潭底眠龍禡老魄从  
聞有藥可贈人君臣佐使超常格詩能醫俗不醫  
貧藥可殺魔如殺賊大通侍兒喫菜根忍饑忍渴  
耽禪寂波旬側日起怨憎道高一尺魔十尺梵聲



半夜入呻吟蒲團坐从生啾唧感君抖擻仙葫蘆  
一顆神丹光閃爍刀圭入口生羽翰起坐經行如  
夙昔老僧鼓掌笑呵呵欲酬藥價慙無藉同是詩  
人且獻詩一家秦越通肥瘠請君放下三指禪共  
談風雅權晨夕曲罷陽春春可回萬彙昭蘇憑鼎  
力殷勤報語世間人藥王乃是今詩伯

題鄭秉淵行樂圖

人在意中影在畫中意中之人無二無別畫中之  
影有異有同同也異異也同墨者黑硃者紅淺者  
淡深者濃坐者石倚者松賞者花侍者童假繪綉  
爲真幻由丹青之化工是果誰氏之子治平南鄭  
其族要識名實之義秉心塞淵其衷久別時相見  
覲面不從容如何是久別時相見敦雅堂前講風  
雅松風座上聽松風神交夢寐通如何是覲面不  
從容君乘車可南可北我戴笠自西自東紅塵白  
業各怱怱

呈山中諸子見訊

多謝題詩寄草堂緘書款款報行藏頻移冷榻蟲



聲換誤蹴殘花屐齒香隨便開窓延月色不勞鑿  
壁借燈光現成受用消難盡分與同叅染指嘗

贈劉醫

大隱先生非等閒一壺懸向市城間竒書蚤得神  
樓祕家學親傳委羽山我以烟霞成痼疾誰將金  
石起衰顏相尋欲向河梁去無那安居人未閒

宋澄溪觀察歸自桂林承致陳開府遠惠賦

謝

卓哉觀察翁殊有東山興結社葑溪旁溪光悅情  
性發軔商洛間畱題徧名勝建節濟東藩岱宗如  
熟徑登高小天下揮洒塵氛淨功成身蚤退就養  
古崧臺西望桂林山三峯兀崔嵬懷人事遠遊到  
日華軒開居亭百尺樓八窓臨九垓平原十日歡  
高歌首重回回首晚香堂抖擻還敲推山中老狷  
鶴一見一徘徊三復紀遊篇心往神追陪問訊賢  
主人樞衡接上台餘光臨蔀屋時雨潤蒿萊遺我  
旃檀香報乏瓊與玫靈山契夙心持贈豈虛來藉  
重觀察翁爲致區區懷榛苓予所思南橘若爲媒



延佇西方人秋江願溯洄  
不晤岡州易秋河二十餘年甲午夏歸自楚  
中寄家丞署一日避暑閱江樓下邂逅頃  
幾昧平生坐定話舊知爲故人驚喜交集  
承贈賦荅

久別秋河秋復秋晚涼乘興共登樓乍逢熟面疑  
生面不覺迴頭笑點頭楚客到鄉仍旅泊山僧出  
世尙淹畱西江東去波濤急相約還家坐釣舟

祝高要王靜齋明府三律

岵嶺太華慶生申琴鶴南來有脚春金地玉泉多  
紫氣瑤林瓊樹出紅塵十風五雨須調燮九棘三  
槐待秉釣擬倣子淵重作頌也知 聖主得賢臣  
百里桃花手自栽崧臺咫尺卽蓬萊曲江曾記傳  
臚入下阪欣逢叱馭來弧矢懸時天宇敞絃歌沸  
處縣門開摩挲老眼觀雲物翹首卽星接上台  
荔丹榴火艷當筵佇見仙鳧覲 九天圭影正中  
群象外 綸音初下五雲邊三農膏雨豐年玉四  
野薰風茂宰絃幾日扁舟宿端水頌聲盈耳入清



和鄭虛舟明府雨中晚泊見寄  
輟棹依羊峽將詩寄虎溪懷人烟雨外老我水雲  
迷白髮釣江上青山在竹西把吟思鄭谷幽鳥隔  
林啼

晚步

暑氣初消得晚涼月痕隨影步迴廊雙柑舉手如  
招客一柚垂頭暗出墻蟲破草根開芋屋鼠緣荷  
葉剝蓮房有情恰與無情會注目空堦夜正長

報丹霞願來和尚

回首丹霞憶舊遊居亭今復見湯休雪巖一榻松  
風滿容我旁人鼾睡否

答李遠霞廣文見寄次來韻二首

深情真得似汪倫寄我詩篇字字新同病相憐懷  
裏事三年一見夢中人僧緣宦况同鷄肋雪骨霜  
毛老鶴身莫負秋風林下約井邊投轄當埋輪  
舊遊回首兩茫然湯把生緣問大顛晝夜循環一  
百八春秋唐喪若干年病魔相伴青燈坐臥佛同



參白日眠我也似君君似我不知誰脆復誰堅

贈李修光榜眼官 殿前侍衛新拜封爵請

覲南還

不羨磻溪老釣綸新礪初發正芳春解頭蚤識無  
雙士狀首還推第二人呈藝從容輕九鼎 賜弓  
談笑弱千鈞禹門擊水神魚躍未免隨波見一鱗  
黃雲紫水偉男兒發軔崆峒上 玉墀三笑橋邊  
新護法二難門下舊師資漢壇日月懸龜鈕 帝  
座風雲起鳳儀 聖世須才非一一南衙退居好

陳詩

盛年飛將老孫吳初拜黃封上大夫飲羽道旁蹲  
石虎綴衣 天上執金吾卿雲應運將龍見畫錦  
還鄉羨鯉趨自笑心空僧及第不知曾否似傳臚  
彭艾菴觀察見過出復園十詠索和次韻做  
白香山放言各言爾志不必其同也  
箕疇用九不用十造物有偏還有全角齒平分牛  
馬走眉毛斲結鳥窠禪續鳧斷鶴難相假栩蜨蘧  
周各自然借問復園老賓主風光曾否似當年



羨君走馬去朝天老我頑灰不復燃小草無心  
成遠志餘生何敢慕修年地爐煨芋留將半雲壑  
誅茅缺一偏有客到來旁問故高懸清福待時賢  
偶因妄想成佳夢占斷桃源獨自耕早出嶺雲隨  
植杖夜來山月照經行松緣斷澗低柯渡水入閒  
房一綫青以此將爲休老計隔離無那有鷄聲  
注日滄桑幾變更暫時贏得濁河清長驅未放輪  
蹄駐安步猶誇脚板輕春夢短來成獨覺秋雲薄  
處見人情遲君莫負籃輿約看盡蓮開菊又生

鶴歸華表見聞新爭似閒園舊主人儉歲庖廚千  
指食凜霜門徑百花新午齋留客叅西竺夜坐看  
星拱北辰莫道使君年紀老詩囊棋局倍精神  
手抱瑤琴返故山五絃一曲想龍顏普天日月  
光華外大地薰風浩蕩間寶硯賜來知靜用  
衮衣披奉得休閒臨池象服君恩重翻笑東樵  
迹待刪蘇東坡詩集卷之六  
高懷真似赤城霞鷺鷺齊飛也不遮遇巷今年同  
渭叟下車到處問西華犀渠照物常燃水魚腹談



兵亦聚沙隨聖世珍從知不免佇看黃髮拜黃  
麻

密邇寧嫌見百疎月華流水到方諸同為蕩子偏  
憐客得遇詩人便起予良覲遠來虛午供春畦將  
去種秋蔬期君薑桂收成日重過山人水竹居

會攜龍劍靖烽烟天上星辰匣裏泉兩手摩挲五  
情熱一光掩映萬人憐从懸霜鏢秋將試偏與鉛  
力晚有緣昨可斷金今繞指藏鋒贏得保遐年

通家世誼老鄉親馬齒輪君四度春魚貫雁行兄  
與弟龍伸夔屈彼何人天生白髮難饒貴家有青  
山未是貧願逐韶光隨驥後年年相見說前因

許鴈洲張素泉謝介白過寺見贈次和  
閒鷗依淺瀨孤鶴守重扉有客相攜入聞聲各自  
飛青山聊共對白雪和應稀興盡且歸去斜陽影

已微  
寄祝陳乾菴開府  
桂山翹首衆中尊百尺樓高紫氣屯領略風雲歸

帝室栽培桃李盡公門三堯久貯三槐望五嶺



看調五氣元河潤西來堪處處不妨泉石亦知恩

題贈鄧炳園書法

君不見公孫大娘舞劍器張旭得之見能事醉來  
散髮濡墨汁大呼疾走神鬼避座客旁觀看不及  
鬚龍飛天蛇蟠地當時草聖不自知後來作者皆  
兒戲炳園居士殊不然撞破烟樓遊六藝草書遠  
接二王傳行楷旁通趙氏秘貽來一幅換鵝經鵝  
潭老僧不識字珍重諦觀還諦觀三點圓。絕同  
異及懃借問壽陵餘邯鄲故步今何如

趙忸烏秋懷圖小影

羲車細碾路旁塵白眼看他只此人蒜髮艾髯無  
老態槐黃柳汗有閒身筆鋒殺盡中山兔茗椀拋  
殘甕底春此是忸烏真面目何須真外更求真

題武進孫輞川馬上小影

不恨與君相見遲恨不見君年少時少時馬上大  
不俗不似他家騎馬兒他人鬢纓衣短後此君小  
帽長衿披他人楊鞭有聲控此君按轡無驅馳他  
人叱咤四顧盼此君淵默方沈思所思乃在經與



史所思乃在文與詞所思乃在山與水所思乃在  
琴與棋君之所思更不爾靈光一點無依違昔所  
未見今始見卽今所見伊爲誰王家鞞川詩有畫  
孫家鞞川畫有詩題詩持贈鞞川子不妨頰下添  
微髭

和梁九野惠蜜柚栽

移來嘉植水雲鄉想到明年有果嘗鳥占低枝因  
葉茂蜜先秋實待花香老饕見卯求時夜童穉編  
茆護雪霜多謝崙溪梁處士人情爭似物情長

壽陳廣文

昨夜放燈燈火燃環橋桃李籠春煙今朝桃李花  
正妍苜宿闌干陳玳筵松花溢甕侯芭酒榆莢盈  
齋司業錢當塔雪色映華髮隔座春風飛柳綿授  
簡相將傳彩筆餘寒不敢欺青氈主人一飲盡一  
石坐客吟詩詩百篇雕文刻鏤間珠玉藻思逸韻  
相昭宣好風吹度鷺潭水水邊喚起船子禪借問  
主人壽何許上元甲子春秋富借問主人官早暮  
澤宮咫尺青雲路借問主人生長處扶胥浴日當



門戶浴日浴月泰階平  
彈冠振策朝登瀛  
金馬恢諧聊玩世  
方朔由來是歲星  
歲星光徹文星爛  
時雨沾濡草木榮  
泮池芹藻珠江月  
參差交暎黃河清  
高歌一曲扣漁鼓  
翹首春光滿穗城

題畫

世路蒼茫半險巖  
危橋峻阪日驅馳  
紅塵到處青山在  
馬首相逢知是誰

晤宋澄溪觀察賦呈

古道今來幸不孤  
高雲流影接平蕪  
立談針芥投膠膝  
欬唾珠璣出玉壺  
霽月光風玄度論  
陽春白雪晚香圖  
東林舊社會相識  
借問宗雷記得無

春日陪宋大夫登閱江樓作

古臺百尺枕江流  
千水千山一日收  
遠岫鬱藍成罨畫  
晴川淨練繞朱樓  
棠陰憩名馴雛雉  
舄影隨喬狎野鷗  
回首鹿湖動歸興  
願依泉石志佳遊

和李天章明經見贈

閒身自笑到城多  
此地經年兩度過  
塵坌不堪成潦倒  
陸沈無計補蹉跎  
風前江色搖藍練  
雨後山



光蘸鬱峨欲上閱江樓上望人肩爭奈苦相摩

寓端州閱江樓賦得崧臺春雪留別宋觀察

大夫還里

崧臺俯瞰石嶙峋銀浦流澌歲序新豐玉預占三尺雪霽雲先布萬家春聞歌知有張燈會擁被欣逢送炭人明日天晴下高峽扁舟歸去事垂綸

壽端州守宋端齋

我聞虎丘之上片石容千人稱物平施如秉釣又聞太湖震澤三萬六千頃昭回雲漢臨通津天平萬笏朝天闕三江映帶波鱗鱗地靈人傑城郭古秀水明山甲第新金閭第宅連雲起風流近接烏衣里忠孝今推大宋家文章久貴長安昏相門家學有淵源濟東廉使踪前軌我公乃是千里駒追風逐電鳴天衢許都賦就夢昆脚明刑弼教腰金魚平反稱旨天顏悅君臣一德相都俞九重天眷古端郡蕭條半壁天南隅孝肅徽音誰嗣美蒼生引領今何如帝曰欽哉卿出守奉命兼程勉馳驟驅車直到古崧臺竹馬壺漿爭輶轅下



車八月秋正中霽月光風徹豐蔀主人一笑黃河  
清十二幅幘皆在宥嚴霜瑞雪報豐年煦日陽和  
應新候百蟲啓蟄轉輕雷五嶺花明獻壽杯岩猿  
野鶴隨飛鳥昨日還山今又來高歌一曲聊自寫  
郡門延佇中徘徊美人贈我如意珠何以報之瓊  
與玫願公心似虎丘石履道坦坦中懷開願公雅  
量如震澤千頃汪波憑溯洄願公直比朝天笏高  
排閭闔躋三台願公澤竝三江水無遠無邇無津  
涯歸猿放鶴隨所適星峯回首卽蓬萊

贈高要明府王靜齋

朝泊端州城暮泊端州城端州端水何清泠諸梁  
受命夕飲冰朝上崧臺山暮上崧臺山崧臺輪轄  
何間關單父鳴琴長自閒有腰不官折此膝不可  
屈道爲蒼生行身以蒼生出雖屈道能伸雖折身  
無失鞠躬盡瘁非所辭不與旁人較勞逸昔有關  
西楊夫子苞苴如浼清如洗今有高要王令公縣  
門如市心如水長安大道直如矢携手同行舊鄉  
里我從世路得良朋不著袈裟人亦僧朝來打鼓



視公事退食閒抄相鶴經午齋客去便束帶閣夜  
焚膏閱訟情閒忙喧寂皆任運穿衣喫飯咸相應  
多不減少不增千古萬古一條冰還山珍重逢人  
說宰官今可入傳燈

賦得痛飲讀離騷廣申前詠爲錢塘姚二曾

題贈

醉翁之志不在酒麴郎權伯曾知否眼中有個獨  
醒人當杯可石亦可斗飲河納海不望腹西江吸  
盡無須口孃生一副鐵肝腸函蓋乾坤吞宇宙醜  
醜雜毒總包荒清濁聖賢胥在宥青州從事供指  
麾三閭大夫作良友平生塊磊自沈酣半卷離騷  
好釐曰沅蘭湘茝當珍饈望舒飛廉挈尊卣一觴  
一詠自唱酬九辨九歌相勸侑楚音郢曲古梨園  
糞壤佩幃今淨丑撫節安歌緩舉杯拍案扣壺狂  
欲歐此是騷人痛飲時得意失意曾何有相逢盡  
是醉鄉人誰爲側弁誰濡首姚先生須抖擻偏師  
突出步兵圍許與靈均親把手

送宋觀察澄溪遊西粵訪陳開府



至人應運如應龍倏忽可雲還可風大人大力如  
飲虹呼吸可雌還可雄高人高論如洪鐘談笑可  
商還可宮達人轉物如轉蓬來往可西還可東君  
不見濟東觀察澄溪翁雄才不與區區同百千日  
月掛眉睫二十一史羅心曾籃輿曾入白蓮社素  
書親授黃石公功成名遂身早退直到羅浮尋葛  
洪手携詩卷光照乘到處留題由化工高吟朗詠  
發長嘯嘯聲飛入軒轅宮磨崖落筆龍蛇走品題  
萬古泉石空花雨下山猿鶴送樵風入峽鳧鷖從  
五馬郊迎駐旌旆斑衣擁筇來雍雍下車上壽盈  
珠履徵歌陽雪娛三冬青皇改歲冰始泮春遊蠟  
屐登星峰蒼梧在望發高興西江流水桃花紅桂  
林叢桂香爛煬灘水灘山佳氣葱千里懷人見顏  
色中丞開府臨西封平生郎舅悵離索春水鯉魚  
情愫通脂車秣馬戒行李傾城祖餞嘶青驄若有  
人兮山之上振衣引領遙相向若有人兮山之間  
青雲白屋遙相關若有人兮山之麓乘車戴笠遙  
相逐若有人兮水之湄釣船畫舫遙相期相期人



在棠陰閣蔽芾清風滿南國百尺樓高見主賓菜  
蚶論罷通憂樂相期人在熙春臺八桂風流今又  
來虞衡有志遺編在懷古匡時共舉杯相期人在  
栖霞洞星巖髣髴東西共危磴躋攀見坦夷熱中  
靜納涼颺動相期人在逍遙樓南華開卷逢莊周  
大鵬飛上九萬里鸞鳩斥鷃鳴啾啾寄聲鵬鷃休  
相誚大知小知通竅妙歸去來歸去來郡齋愛日  
承懽笑荔枝紅映菖蒲花莫負前期泥登眺圓虛  
別有天水月千江照三生石上話無生莫管三玄

與三要

和謝奕亭過訪不遇之作

宛陵聲價重人寰結束奚囊客庾關珠海吟殘官  
舍月鐵橋題徧洞天山尋僧遠棹心兼遠笑我閒  
雲去未閒長揖紅塵歸舊社琅玕留贈慰衰顏

和江秋溪過訪不遇之作

自是龍阿難苟合不辭針芥遠相關坐來片石孤  
心冷悟入三生萬境閒野寺尋僧空返棹行雲出  
岫不離山留題知有江淹筆墨瀋淋漓待我還







揮其如土之金解以挂杖之錢攜手同歸什襲周  
旋側身乎縑緗之散帙不改其物色之華鮮出而  
植之以磐石滌之以清泉菁蔥如昨生意勃然旁  
觀者謂其貞固不凋長生難老也因而名之爲萬  
年厥名則一厥類實繁細莖直幹枝疎葉圓者出  
自羅浮丹嶠之澗駢柯交蔭節錯根盤者產於鳳  
皇海島之山方諸徂徠之植天目之產各同氣以  
相求能任運而不遷者也緬茲嘉卉夙膺梁甫之  
崇封近洽野人之真趣名已重於棟樑情獨深夫  
澤霧意其謙而尊尊而光光而著者耶東樵老樵  
幸而遇之欣而慕之不覺心契而神交遂爾寫心  
而作賦賦曰何大塊之盤固兮初儲精而積氣  
旣清升而濁降兮遂群分而類聚本乎地而親下  
兮勾以萌而拔萃依山澤而成形兮挺雲霄而聳  
峙或爲拂日之槲桑或爲不周之天柱或爲南國  
之甘棠或爲西乾之寶樹或競秀於春華或萎芳  
於寒沍或脆或堅稟剛柔以成性無小無大惟天  
真之各具爰有蒼松偃蓋遊龍華呈五粒望重八



公千尺百尺不能繫其修短一枝一葉靡不由於  
化工詩書所載既其大而未既其小知其異而未  
知其同也彼壽松之鬱鬱兮胡歲月之悠悠雖一  
丘而一壑兮歷萬古而千秋藐苓栢於何有兮實  
雨露之所畱匪匠石之能顧兮惟仙人之是求咀  
嚼其莖葉兮沁芬芳於肺腑披尋其根柢兮遡出  
處於瀛洲美芹昌歎不足多兮小草遠志胡爲乎  
兼收惟斯松也列諸清廟明堂之上無羨乎大貝  
而天球立諸交衢廣陌之衝何有於佩玉而鳴騶  
置諸大庭廣衆之會差勝夫列鼎之珍饈當夫東  
風解凍薰風炎熱商風蕭瑟朔風栗烈斯松兀然  
不隨草偃不爲木折及夫春雨泥濘暑雨侵陵秋  
雨破塊寒雨堅氷斯松寂然柯不爲改葉不爲零  
惟其壽也故能久也惟有守也故不朽也彼度索  
之桃三千年而華三千年而實松將與之爲友上  
古之椿八千歲爲春八千歲爲秋松實匹之爲耦  
視彼朝菌之初生方以薜花之暫秀何以異於風  
燭爭光於望舒黃童齊肩於白叟駿馳騫趨瞠乎



其後之矣覩茲松也得幽人之貞焉知明德之馨  
焉察造化之靈焉通物類之情焉信致曲者之有  
誠焉誠則形形則著著則明焉故曰天得一而清  
地得一而寧人得一而貞物得一而長生一者何  
至誠無息之謂乎松乎松乎吾將與子相期於無  
何之鄉廣莫之野太虛無朕之庭乎

松鶴賦爲王固山裕公壽

有岱宗大夫與青田羽客相遇於寧澹之堂各多  
其齒而侈以相尚岱宗大夫曰吾將以圓象爲偃  
蓋以方輿爲盤根以天澤爲飲食以雲物爲弟昆  
以鄧林豫章之材爲僕御以徂來天目之植爲兒  
孫先三才而無始後萬物而長存齒吾之齒莫或  
尚之也矣青田羽客軒然遠引躍然起舞翺翔寥  
廓之間還集廣莫之野揖大夫而語之曰植而靜  
者孰若飛鳴之得所乎華而實者奚如神骨之有



主乎吾將餐煙霞駕雲霧朝發軔於孤山夕憩息  
於元圃吹笙緜嶺唯予與俱直閣登瀛舍吾誰與  
更三百六十歲而玄裳歷千有六百年而素羽齒  
吾之齒齒大夫之齒吾未見其優劣也二者相持  
莫決客兩可其言質諸東樵之老樵老樵釋負而  
立良久語客曰子獨不知有寧澹主人之所尚乎  
非澹泊無以明志非寧靜無以致遠昔人之言主  
人託以自踐也味以澹而受和居以寧而行簡有  
味其言思過半矣主人出身爲三韓三輔之豪仰

受九重九五之眷運籌南海勢如運海之鵬鞏固  
山河實膺固山之選待推轂而不遲快登壇之未  
晚行且之屏之翰爲楨爲幹撐天柱地標銅柱於  
要荒拂日凌霄布棠陰於陬甸千秋帶礪與國同  
休奕世風雲乘時丕變方之於物後凋勁節未足  
擬其堅貞進之以道大器晚成當無容其泮渙彼  
受秦封爲大夫者瞠乎後之退而遜之矣若乃儀  
廷之鳳埒以鳴臯之禽薜谷之律齊以元圃之音  
宜天上之靈瑞非山中之羽客所得絜其長而等



其倫也寧澹主人聞而笑之曰東樵老樵誠相成  
哉爰命左右具松膏之醴酌鶴頂之觥披松鶴之  
圖協松鶴之情日與岱宗大夫青田羽客相見於  
文字之表得心忘像得意忘形懽然盡醉歌以商  
聲歌曰松之秀兮菁菁鶴之立兮亭亭上有兔絲  
兮下有伏苓鳴者聞于天兮和以寧馨善萬物之  
得時兮遂吾心之澹寧還報東樵東樵次其言以  
賦之爲松鶴遐年之慶

白鸚鵡賦

何奇翼之皚皚兮產白帝之金方衆皆翠襟而赤  
羽兮已獨素衣而縞裳惟孤潔之弗緇兮胡五色  
之文章哿矣性而能言兮比令德於珪璋遡林邑  
之獻瑞兮暨柳舜之遊郎珊瑚架上反挂空宮之  
月沈香亭北喚來雪衣之孃翻楸枰之玉局膺寵  
眷於君王斯固昭質之足羨猶慮玉體之靡常惟  
茲皎其不昧亦復矚然自彰冰姿綽約不啻藐姑  
之朝浴娥眉澹掃奚羨壽陽之晚妝若乃獨立庭



階友九臯之鷓鴣昇樓峙築齊五德於陳倉飾雕  
籠如貯金屋孰若返隴山以自適霑素襟以却回  
祿何如出火宅而相將于是鴻冥高舉駕雲霓而  
遠引縱令弋人奚慕徒網罟之虛張俯觀儔侶繫  
彩縵而嬰金鎖仰視蜚雁越關塞而避風霜其榮  
辱勞逸之相去恍若雲泥之隔於天壤也爰戢其  
羽載翺載翔求其友聲如宮如商羣揚珂雪之喙  
齊鼓樊素之簧有自在先生者爲之首唱歌以亂  
之曰善巧者或妒之長多言者或來之殃逝將與  
滋拙拙訥訥緘口結舌浣心滌腸相與全其貞白  
之性逍遙於太素之鄉



琳樂

石骨雙清賦

題王徐二子行樂圖

石有骨而崢嶸山有骨而峻嶒水有骨而清泠卉  
木有骨而菁英世間所有盡如此何況男兒落地  
因一聲未生肌肉先生骨然後得爲萬物之最靈  
志爲骨之髓氣爲骨之精神以骨而健才以骨而  
生耳以骨而聰目以骨而明手以骨而秉執足以  
骨而運奔體以骨而正直心以骨而和平文以骨  
而有章詩以骨而成聲骨之於人大矣何況二  
人同心携手同行出處語默惟其與之所適骨爲



之主有攸往蒞利貞固匪霜而不可欲舍骨其焉  
憑以予所知如王子燦艾徐子方彙者洵塵中之  
皎皎石中之硜硜負其骨而遊海岳堅其骨以事  
遐征常掉臂於山陰之道上早脫穎於會稽之蘭  
陵擊楫兮五湖七澤作賦兮三都兩京忽乘興以  
俱往復竝轡以躋登適高涼之古郡入五馬之郊  
垌雖遊戲夫三昧匪有骨而奚勝當其寄傲於石  
骨也豈徒有取乎其實實有契於其名爾乃構數  
椽之茅屋蔭百尺之垂藤布一席以容膝歛一枕  
而曲肱倚千章之古木快羣鳥之飛鳴挹萬山之  
滴翠來片月之孤明春華秋實垂檐接楹枕椰帶  
索椰酒懸罌蕉梳枝指波羅贅瘦品離支之香味  
麝荷芰之芳馨就石床而促膝歌白雪而飛觥此  
時樂甚不知城市之爲空谷之爲蓬瀛也時或側  
耳而聽樵歌牧笛若遠若近而從衡蟬聲蛩韻如  
泣如訴而咿嚶冷風小和飄風大和刁刁調調之  
衆籟或前或後而鏗鏘時或凝睇遐矚起朝烟於  
長薄捲雲岫於杳冥農竝耦而播穀婦炊黍而饁



耕浣衣負汲攀裳挈瓶來遠帆于絕浦停短棹於  
沙汀收宿雨而返照斂薄霧於翠屏眺樺蕪乎神  
電之故址儼旌旆乎錦繖之荒城爰撫今而懷古  
亦感物以興情旣忘形而息影當離影以求形乃  
有閩中佳士技擅丹青乍邂逅而晤對遂磅礴而  
經營合金蘭爲膠漆肖石骨以儀型添三毛而髣  
髴具四美而兼并納須彌於芥子快良覲以班荆  
諦觀莫識其真勾賓主無事於逢迎於是詠歌贈  
荅楮素克盈長安爲之紙貴三峽於是建瓴有東  
樵之老樵者來自鼎湖之頂憩于西爽之庭偶披  
圖而想像旋撫景而神凝恍石骨之伊邇欲問津  
而未敢返吾棹於鷺潭之矮屋馳夢想乎石骨之  
居亭鼓棹而歌歌曰石有骨兮山有稜士有骨兮  
德有鄰燈是火兮火是燈冰爲水兮水爲冰有骨  
無骨兮誰濁誰清世莫得而辨之兮辨之以當局  
之良朋旁觀之老僧



北浦亭

之與以成其人之志也

其志之與以成其人之志也

其志之與以成其人之志也

其志之與以成其人之志也

其志之與以成其人之志也

其志之與以成其人之志也

其志之與以成其人之志也





書